

Embibo Y'okutaikirizana

Phoenix, Arizona, USA

Okwokubanza 18, 1965

1 Naatoorana eishomo rikye ekir eki, nari ekicweka kigufu, Mukama ku araasiime, atuhe omutwe gw'eishomo eryo, kuruga omuri Matayo Orikwera 13:24 okuhitsya ahari 30. Reero nabwo ni-niinyenda kushoma okuruga ahari 36 kuhitsya ahari 40, omu kaanya kakye konka. Hati Matayo Orikwera, eshuura ya 13, n'okutandika n'omushororongo gwa 24 gw'eshuura ya 13 ya Matayo Orikwera. Muhurikize mutaireho omutima okushomwa kw'Ekigambo. Ebigambo byangye nibiremwa, kwonka Ebye tibirkuremwa.

Kandi akabacwera endijo nfumu, naabagira ati: Obukama bw'omu iguru nibushushanisiba n'omuntu owaabibire embibo nungi omu musiri gwe;

Kandi abantu ku baabaire bagwejegyeire, omuzigu we yaija, yaabiba enkyenzi omu (ngano), yaayegyendera. (Engano ku zaamezire, zaaba) obushiisha, enkyenzi nazo zaareebeka.

(N'ahabw'ekyo) abahuuku baija, baagambira Mukama waabo bati: Mukama waitu, torabibire embibo nungi omu musiri gwawe? Mbwenu kandi enkyenzi zirugire hi?

Reero yaabagarukamu ati: Ekyo kikakorwa omuzigu. Reero abahuuku baamubuuza bati: Mbwenu shi, nooyenda ngu tuyende . . . tuzikuuremu?

Yaabagira ati: Ngaaha! Obundi mukaaba nimukuuramu enkyenzi, mukuuriranamu (n'engano).

Murekye bikure byombi, bihikye omu igyesha; kandi omu igyesha ndyayohereza abagyesi nti: Mubanze mutooranemu enkyenzi, muzibohe enganda zookibwe, reero (engano muzihunikye) omu (kitara).

2 Mwayetegyereza, "Mubanze mutooranemu enkyenzi, kandi muzibohe enganda"? Hati, ku mbaire ninshoma eki, hariho ekintu ky'omutaano ekinyizireho obu mbaire nshutami eruguru okwo aha mutwe gw'Enshozi za Catalina ekir eki, ninshaba. Reero naateekateeka, ninkahi ahu naakubaasa kutunga ekigambo eki naakubaasa kukozesa ahari eki eki ndikwenda kugambaho ekir eki?

Reero naashuuma naatunga ekigambo okutaikirizana, n'ahabw'ekyo naakwata kashoboorozi naareeba amakuru g'ekigambo okutaikirizana. Kandi nikimanyisa "okubiba okutaikirizana," nari-nari, "kuba orikuhakanisa," nk'oku Webster erikugamba, "kubiba okutaikirizana, ekintu ky'omutaano," nari "kuba orikuhakanisa ekintu ekishangirwe kiriho." N'ahabw'ekyo naateekateeka, eishomo ekir eki, niinyija kuryeta: Embibo y'Okutaikirizana. Kandi niinyesiga ngu Mukama naija kuha Ekigambo Kye omugisha hati twaba Nitukigambaho.

3 Kandi nabwo nitumanya ngu Akashoboorora, omu mushororongo gwa 36 n'o-n'okuhitsya aha gwa 43, oku embibo egi yaakuzire. Kandi tukiri aha kintu eki, reka tukishome ekyo nakyo, omushororongo gwa 36 hati okuhitsya aha gwa 43.

Bwanyima Yesu yaaraga emitwe y'abantu, yaataaha omu nju. Abeegi be baamwirira haihi, baamubuuza bati: otushobororere amakuru g'enkyenzi z'omu musiri.

Yaabagarukamu ati: owaabibire embibo nungi n'Omwana w'omuntu;

Omusiri n'ensi; embibo enungi nibo baana b'obukama; enkyenzi n'abaana b'Omubi;

Omuzigu owaazibibire ni Sitaane; eigyesha niyo mperu y'obusingye obu; n'abagyesi ni baamaraiaka.

Nk'oku enkyenzi zirundwa hamwe, zikookibwa n'omuriro, nikwo kiriba kityo aha mperu y'obusingye obu.

Omwana w'omuntu aryatumma baamaraiaka be, nabo baryaiha omu bukama bwe byona ebirikuteza abantu entsibo, n'enkozi z'ebibi,

Binagwe omu muriro, omu kikoomi ky'omuriro; kandi omwo nimwo abantu baricurira, nari bariririra, bakanena enshaya.

Obwo abahikiriire baryayengyengyeta nk'eizooba omu bukama bwa Ishebo. Oine okutu, . . . ahurire.

4 Ogwo ni Yesu orikushoboorora orufumu oru, We wenka, n'ahabw'ekyo obwo nitumanya amakuru g'okushoboorora oku. Kandi hati twaba nitugamba ahari eki, eky'okubiba embibo oku n'o-n'okushaarura, hati Naakishoboorora. Reero niinyikiriza ku Yesu yaabaire naagamba orufumu oru omu biro Bye, kwonka akaba naarumanyisa kubaho aha muheru gw'ensi, nari, omuheru gw'obusingye, kandi nibwo obu bwire. Kandi niinyikiriza eishomo rikye eri ekir eki nirikwatana gye munonga n'obwire obu tutwiremu, ahaw'okuba Yesu akagamba hanu kurungi munonga ku "okurundaanwa okwo kwabaire nikuza kubaho aha muheru gw'ensi egi," ku obwo nibwo emperu eribaho; okurundaanwa kw'engano, kandi nabwo n'okurundaanwa kw'enkyenzi n'okuzootsy, kandi n'okutaasyamu engano omu Bukama. Kandi niinyikiriza okwo nikwo kyabaire.

Kandi Ekyahandiikirwe ekindi ekirikunyebembera kwikiriza nti, eki mpandiikire hanu, ni Matayo 24:24, ahu

kyagambire ngu, nikigamba aha ki-kitebe, embibo y'okutaikirizana. Yesu akagira ngu zombi ziryaba ziri haihi kushushanira kimwe kuhitsya obu zirihabisa n'Entoore kyaba nikibaasika. Haihi kushushanira kimwe.

5 Omwanya ogundi omu Byahandiikirwe ahu kihandiikirwe, ngu enjura egwera abahikiriire n'abatahikiriire.

Niinyijuka ekyambaireho okubanza obu nyija omu Bapentekoote. Nkaba ndi Mishawaka, Indiana. Kandi nkaba ndi omu ruteerano ruhango, ekishengye haihi nk'eki, ahu ab'obukiizi-bwa-Bumoshn n'ab'obukiizi-bwa-Buryo baabaire bateeraniire. Ahabw'enshonga y'ebiro ebyo, ey'okushoroora omu rangi, bakaba nibateekwa kubuganira eruguru okwo. Bakaba bari ebibiina bibiri bikuru by'ab'eishe-emwe b'Abapentekoote. Nkaba ntakabahurirahoga nari okubabugana. Nigwo murundi gw'okubanza ogu naahuriireho okugamba omu ndimi. Kandi aha muheru gw'ebiro ebikurataine, by'oruteerane . . . Nyowe ahabw'okutaba omukuratsi waabo, nkaba ndi omuheereza muto w'Omubaputisiti kwonka, nkashutama okwo enyima munonga. Kandi niinyijuka omurundi gw'okubanza ogu naahuriire omuntu naagamba omu ndimi, tindamanyire nangwa eki-eki kyabaire nikimanyisa. Reero abashaija babiri aba, okukira munonga, bakaba bashutami omu maisho, omwe akaba agamba omu ndimi ondijo ashoboorora eby'ogwo muntu yaagamba. Mpaho, nkatandika kushoma Baiburi yangye munonga nk'oku naabaire nimbaasa, ahonaaho, naashanga ngu ekyo kikaba kiri omu Byahandiikirwe. Ekyo buzima nikyo Ebyahandiikirwe, Omwoyo Orikwera yaabaire naaza kukora.

6 Mpaho, nk'ekiro kimwe ahanyima y'ebyo . . . Ekiro ekyo omutima gwangye gukateganisibwa munonga. Nkaraara omu musiri gw'ebicoori. Nkaba ntaine esente ezirikugasha kwetungira e-e-ekitanda, n'ahabw'ekyo nkaba nyine esente ezirkumara kuntwara omuka, reero naagura zaadonaati nkye, ezaabaire zimazireho ebiro bikye, nari emigaati, nikwo yaabaire neeyetwa, ahabwa kyantsya yangye. Kandi nkaba ntagiriirwe kurya nabo, kwonka nkaba ntaine esente z'okutamu. Omu biro ebyo, obwo bukaba buri obwire bw'eibura rya sente, 1933, n'ahabw'ekyo bikaba-okubaho kukaba kugumire munonga. N'ahabw'ekyo naateekateeka nti, "Mpaho, naaza . . . tindikwenda kurya nabo, kwonka niinyenda kumanya eki baine. Baine ekintu eki ntaine."

N'ahabw'ekyo akasheeshe ako nkaba ndi . . . bakanshaba bat, "Abaheereza boona baije aha kituuti kandi oyeyanjure kusha, eiziina ryawe, n'ahu orikuruga."

Mpaho, nka-nkagamba kwonka nti, "William Branham, omubuurizi w'engiri, Jeffersonville," naashutama ahansi. Mbwenu, obwire obwo niinye naabaire ndi omuheereza orikukirayo obuto aha kituuti. Reero ekiro ekyakuratiireho baanyeta aha kituuti kugamba. Reero ku naaherize kugamba, ahabw'enki, tukatunga obwire burungi munonga, reero naatandika kubugana abantu abatari bamwe nibandaarika kuza omu makanisa gaabo. Reero ahanyima yaabo . . .

7 Ahanyima y'ebyo, ahabw'enki, naateekateeka nti, "Kuri nimbaasa kuhika ahu abashaija aba babiri bakuru bari ababaire nibagamba omu ndimi kandi nibazishoboorora!" Ekyo kika nikinyotsya omu mutima, nkaba ninkyenda munonga. Mpaho, nk'oku naabagambiire omu kutandika, ekiconco kikye eki orikukurura. Nimumanya, ebiconco n'okwetwa tibyegamira okweteisa, oguma nabyo ebiro byona by'amagara gaawe, mwareeba, ozaarwa nabyo, ku biraabe biri ebiconco bya Ruhanga. N'ahabw'ekyo nkaba obutoosha, kuruga obu naabaire ndi omwana muto munonga, obutoosha kikaba kimbaho, abantu abarikuumanaya amagara gangye goona, nibamanya ekyo ku n'amazima. Mbwenu, ku naabaire nteekateeka . . . Nkaba ntarikumanya eki kyabaire kiri obwire obwo, nkaba nkyeta okworekwa, nkaba ntarikumanya eki kyabaire kiri. Kwonka nkateekateeka nti, "Kuri nimbaasa kugamba nabo!" Mpaho, kandi omwoyo ogwabaire guri omu kyombeko omwo gukaba guri nk'Omwoyo wa Ruhanga buzima.

N'ahabw'ekyo nka-nkabaasa kugamba n'omwe aharibo, naamubuuza ebibuuzo bikye, kandi akaba ari Omukristaayo ohikire w'amazima. Hakaba hataraho kubanganisa ahari ekyo, ogwo mushaija akaba ari omwikiriza kashushu. Kandi omushaija ondi, ku naagambire nawe, ku ndaabe ndabugaineho endyarya, akaba ari omwe aharizo. Omushaija ogwo omu mazima akaba . . . Omukazi we akaba ari omukazi oine eishokye ririkishusha nk'ebinyaatsi byomire, kwonka akaba azaire abaana aha . . . abaana babiri aha mukazi oine eishokye eririkwiragura. Reero naateekateeka nti, "Mpaho, hati eki n'enki? Nkiki hanu, na-naaburabuzibwa munonga. Ndi orikwikiririza omuri kikahandiikwa; nikiteekwa kuba Ekigambo, kitari ekyo nikiba kitahikire. Mbwenu ngugu hanu ogwo Mwoyo, omwe akahurirwa, okurugiirira omu kumanya kwangye kwona, ari ow'amazima; kandi ondijo ori akaba atari murungi na kakye; kwonka Omwoyo akaba naabashuumaho bombi. Hati, ekyo nikibaasika kita?" Nkaagira, kikambuzabuza.

8 Emyaka ebiri bwanyima, nkaba ninshaba omu nyanga ahu naabaire nza kushabira. Omu nyanga hakaba harimu omucuucu, kandi eihangwe rimwe nkashohora, naata Baiburi yangye aha mpimbi, reero omuyaga Gwagihuua gwabiikuura omu Baheburaayo, eshuura ya 6. Ahaabaire nihagira ngu, omu biro by'aha mperu, oku kyabaire nikiza kuba ku turaagwe twaruga omu Mazima kandi tukeegarura bwa kabiri omu kweteisa, haba hatakiriho kitambo ahabw'ekibi, kandi n'oku amahwa n'amatojo, agaabaire gari haihi kwangwa, n'omuheru gwago kuri okwokibwa; kwonka enjura egwa kaingi, aha itaka, kuriitirira, kurihinga; kwonka amahwa n'amatojo biryayangwa, beitu engano ziryarundaanwa. Reero naateekateeka nti, "Mbwenu, kyabaho kwonka omuyaga gwahahuua haabiikuurwa." Mpaho, naagaruka naata Baiburi ahansi. Reero naateekateeka nti, "Mbwenu, hati naaza . . ." Kandi ngugu hanu omuyaga gwaija Gwagibiikuura. Ekyo kikabaho emirundi eshatu. Ntyo naateekateeka nti, "Mpaho, hati, ekyo n'eky'omutaano."

Reero ku naabaire niinyimuka, naateekateeka nti, "Mukama, ahaw'enki Wambiikuurira Baiburi egyo kushoma ekintu ekyo, ni . . . ku ndikuhika ahari ekyo, ahu 'amahwa n'amatojo, agari haihi kwangwa, n'omuheru gwagwo kuri okwokibwa'?" Naateekateeka nti, "Ahaw'enki, Wambiikuurira ekyo aho?" Kandi ku naabaire nindanzya omu maisho gangye . . .

9 Hati, okworekwa oku kw'amazima kwija hatariho okukurura kutaaha omu giya yoona. Ogwo ni Ruhanga wenka. Mwareeba? Nkaimutsya amaisho naareeba ensi eyaabaire neeyetoroora omu maisho gangye, kandi naareeba ku yoona yaabaire ehangirwe. Hakaba hariho omushaija ojwaire ebirkwera, owaagyenzire naabiba engano. Bwanyima ku yaarengyeire ahu ensi eherera, haija omushaija, orikushusha kubi, kandi akaba ajwaire ekijwaro kirikwiragura, kandi naamiishiiramu embibo z'enkyenzi hoonahoona. Zombi zikamerera hamwe. Kandi ku zaamezire, zombi zaagira eiriho, ahaw'enki enjura ekaba neeyetengwa. Kandi buri emwe ekareebeka orikushusha oti neeshaba, obwo einikire omutwe gwayo mukye eti, "Mukama, yohereza enjura, yohereza enjura." Reero ebicu bihango byajia, enjura yaazigwaho zombi. Ku yaagwire, egyo ngano nkye yaaguruka reero yaatandika kugira eti, "Mukama asiimwe! Mukama asiimwe!" N'egyo nkyenzi nkye yaaguruka aha rubaju aho honyine, yaagira eti, "Mukama asiimwe! Mukama asiimwe!"

Reero okworekwa okwo kwashoboororwa. Enjura egwera abahikiriire n'abatahikiriire. Omwoyo niwe omwe naabaasa kushuma omu ruteerano, kandi buri muntu Amushemerererwe: endyarya, Abakristaayo, n'abandi boona hamwe. Buzima kihikire. Kwonka niki? Bamanyirwa aha byana byabo. Mwareeba? Okwo nikwo kirikubaasa kumanya wa konka.

N'ahaw'enki nimureeba ekyo hati, ahaw'enki oburo bw'omu ishwa, nari engano z'omu ishwa n'enjuma obumwe n'obumwe bitooreza enjuma y'amazima, enjuma erikuhingwa, biri haihi kushushanira kimwe bibone kuhabisa n'Entoore. Nintekateeka ngu tutwire omu busingye bwonyine, obu ebintu ebi bishemereire kubuirwa n'okugambwaho.

10 Yetegyereze omu mushororongo gwa 41, ezo ibiri nazo nizishushana munonga, nizishushana munonga omu biro by'aha mperu kuhitsya obu Atarakikozire . . . Akaba atarikubaasa kwegamira ekanisa nanka kubataanisamu, tugambe, Abametsodisiti nari Abapenisiti, nari Abapentekoote, okubataanisamu. Akagira ati, "Aryatuma baamaraiaka Be kubataanisamu." Maraika naija kureeta okutaanisamu, okushoroora ahagati y'ab'amazima n'ab'ebishuba. Kandi tihariho n'omwe orikubaasa kukora ekyo kureka Maraika wa Mukama. Niwe orikuza kumanya ow'amazima n'ow'ebishuba. Ruhanga akagira ngu Aryatuma baamaraiaka Be omu bwire bw'aha muheru. Tibari baamaraiaka kurabira ahansi hanu, kureka baamaraiaka omu bwire bw'aha mperu, kandi baryarundaana hamwe. Nitumanya ngu obu n'obwire bw'eigyesha oburikwija hati. Hati, maraika omu mazima nikishoboororwa nka "entumwa." Kandi nitureeba ngu hariho baamaraiaka mushanju b'amakanisa mushanju, kandi hati . . . ngaaha, omu busingye bw'ekanisa obwo.

Yetegyereze abu Yaagambire ngu n'ababibi, kandi nabwo n'eki ezo mbibo zaabaire ziri. Omwe, omubibi akaba Ariwe, Omwana wa Ruhanga, Owaashohoire naabiba Embibo. Reero omuzigu yaija enyima Ye, owaabaire ari Sitaane, kandi yaabiba embibo y'okutaikirizana, bwanyima y'okubibwa kw'Embibo nungi. Hati, banywani, ekyo kibaireho omuri buri busingye kuruga obu tugira ensi. Buzima. Okurugira kimwe omu kutandika, kikatandika ekintu nikyo kimwe.

11 Hati Akagira ati, "Embibo ya Ruhanga, Ekigambo kya Ruhanga." Yesu akagamba, omu mwanya gumwe, ngu "Ekigambo n'Embibo." Kandi buri mbibo eryazaara omu muringo gwayo. Kandi hati, Omukristaayo, abaana ba Ruhanga, abaana b'Obukama ku baraaabe bahindukire eggyo Mbibo ya Ruhanga, obwo nibateekwa kuba Ekigambo kya Ruhanga, Ekigambo kya Ruhanga ekyorekirwe omu busingye obu batwiremu, ahaw'enki Embibo eyaaraganisiibwe y'obusingye obwo. Ruhanga akaha Ekigambo Kye omu kutandika, kandi buri busingye butungire Embibo yaabwo, obwire bwabwo, okuraganisibwa kwabwo.

Hati, Noa ku yaizire, akaba ari Embibo ya Ruhanga, Ekigambo kya Ruhanga ahaw'enki obwo.

Musa ku yaizire, akaba atarikubaasa kwija n'obutumwa bwa Noa, bukaba butarikubaasa kukora, ahaw'enki obwo akaba ari Embibo ya Ruhanga omu bwire obwo.

Bwanyima Kristo ku yaizire, Akaba atarikubaasa kwija n'obusingye bwa Noa nari obwa Musa; bukaba buri obwire Bwe, obw'omwishi oshugaine kugira enda n'okuzaara Omwana, kandi akaba Naija kuba Mesia.

12 Hati, tutwire omu busingye bwa Luteeri, omu busingye bwa Wesili (obusingye bw'Abametsodisiti), omu busingye bwona, n'obusingye bw'Abapentekoote, kandi buri busingye buhairwe okuraganisibwa kw'Ekigambo. Kandi abantu b'obusingye obwo, abarikworeka ekyo Kigambo ekyaraganisiibwe, nibo Mbibo y'obusingye obwo, kurugiirira aha bi Yesu yaagambire hanu hanu ati, "Nibo baana b'Obukama." Ekyo kihikire. Okweyoreka kw'Omwoyo Orikwera naakorera omu baana Be nizo ezo Mbibo z'Obukama omu busingye obwo.

Yetegyereze, enkyenzi nizo zaabaire ziri, omuzigu, Sitaane, owaabibile okutaikirizana, nari e-nari e-embibo y'okutaikirizana, niwe owaabaire naajunaanwa okukora ekintu kibi eki. Sitaane akabiba embibo ye okuruga omu kutandika, obu Ruhanga yaata eigyesha Rye ry'okubanza ry'abantu omu nsi. Adamu, tihariho kubanganisa, okuhitsya obwo akaba naamanya ku haabaire hariho o-okumanya amazima, n'okumanya ekirungi n'ekibi, konka

akaba atakahikire ahari ekyo na kakye.

13 Kwonka nitureeba ngu, Ruhanga akaha abaana Be Ekigambo Kye kuba Oburinzi bwabo. Obwabo . . . Titwine Eky'okuturinda ekindi ekirikukira Ekigambo kya Ruhanga. Obwo nibwo Burinzi bwaitu. Tihariho zaabomu, tihariho buhungiro, tihariho emyanya y'okwesherekamu, tihariho za Arizona nari za California, nari ahantu hoona; hariho Oburinzi bumwe bwonka obu twine, kandi ekyo n'Ekigambo. Kandi Kigambo akaba omuntu yaatuura naitwe, niwe Kristo Yesu, Niwe Burinzi bwaitu wenka. Twaba turi Omuriwe, nituba turi buhooro.

Nangwa n'ekibi tikirkubarirwa aha mwikiriza w'amazima. Ekyo mubaire nimukimanya? Ozairwe Ruhanga, takora kibi, tabaasa kukora kibi. Mwareeba? Nangwa tikimubarirwa. Ahabw'enki, Daudi akagira ati, "Aine omugisha omuntu ou Ruhanga ataribarira kibi." Ku oraabe ori omuri Kristo, nooba otaine kyetengo ky'okukora ekibi. "Orikuramya, ku aheza kushemezibwa rimwe buzima, aba atakyemanyaho kibi," torikukyetenga. Hati, aha nsi, noobaasa kuba omusiisi; kwonka, ahari Ruhanga, tori musisi, ahabw'okuba ori omuri Kristo. Noobaasa ota kuba omu musiisi kunu ori muri Ogwo otaine ekibi, kandi Ruhanga areeba Ogwo wenka Ou orimu?

14 Hati obwire obu bw'eigyesha. Omu kutandika, obu Ruhanga yaabiba Embibo Ye omu nsi kandi akagihayo omu mitima y'abaana Be, eka Ye, kurinda Ekigambo ekyo, ekyo nikyo kyabaire kiri eky'okubarinda kyonka, kurinda Ekigambo ekyo! Ngugu hanu omuzigu yaija yaasheenya eky'okuzibira ekyo, ahabw'okubiba embibo y'okutaikirizana, erikuhanisa Ekigambo kya Ruhanga. Ekyo ku kiraabe kyabaire kiri okutaikirizana omu kutandika, na hati n'okutaikirizana. Ekintu kyona ekirikwongyeraho ekintu kyona aha Kigambo kya Ruhanga, na hati n'embibo y'okutaikirizana! Tindikufayo nikiruga nkahi, ku kiraabe nikiruga omu kibiina ky'ediini, ku kiraabe nikiruga omu mahe, ku kiraabe nikiruga omu bushoboorozi bw'ebi'obutegyeki, ekintu kyona ekirikuhakanisa Ekigambo kya Ruhanga, n'embibo y'okutaikirizana.

Omuntu ku arikwemerera akagira ngu n'omubuurizi w'Engiri, reero akagira ngu "ebiro by'ebi'amahano bikahwaho," egyo n'embibo y'okutaikirizana. Omuntu ku arikwemerera akagira ngu n'omuheereza, omuriisa w'ekanisa y'ahantu nanka, kwonka atarikwikiriza ngu Yesu Kristo tahinduka omuri buri kintu (kureka omu mubiri gw'obutoosha), tahinduka, oku abaire ari nyomwabazyo, n'eriizooba nikwo ari, kandi nikwo ariguma ebiro byona, egyo n'embibo y'okutaikirizana. Ku araagire ngu "ebi'amahano n'obusingye bw'entumwa bikahwaho," egyo n'embibo y'okutaikirizana. Ku baraagire ngu, "Tihariho ekintu nk'obutambi bwa Ruhanga," egyo n'embibo y'okutaikirizana. Kandi ejiwire ensi. Ekanyiire kimwe kandi neenyuruza engano.

15 Nitureeba ngu omubibi w'okubanza w'embibo y'okutaikirizana akeetwa "Sitaane," kandi nitumanya ngu akaba ariwe, omu Kutandika 1. Hati nitureeba ngu, na hanu omu-omu Kitabo kya Matayo, eshuura ya 13, Yesu naakyeta buri kutaikirizana kwona n'Ekigambo Kye kuba "Sitaane." Kandi omwaka ogu gwa 1956, ekintu kyona ekirikubiba okutaikirizana, okruhakanisa Ekigambo kya Ruhanga ekihandikirwe, nari Kukishoboorora nk'oku orikwewendera, n'embibo y'okutaikirizana. Ruhanga tarikukiikiriza. Tarikubaasa. Tikirikubaasa kujwanga. Buzima tikirikubaasa. Ni nk'akajuma ka sinaapi; tikarikubaasa kujwanga n'ekindi kintu kyona, torikubaasa kukajwanga n'ebindi, nikiteekwa kuba ekintu ky'amazima. Embibo y'okutaikirizana!

16 Hati nitushanga ngu, Ruhanga ku yaabibire Embibo Ye omu Kibanja kya Edeni, nitureeba ngu ekazaara Abeeli. Kwonka Sitaane ku yaabibire embibo ye y'okutaikirizana, yaazaara Kaini. Emwe ekazaara ogwo ohikiriire; endiijo yaazaara otahikiriire. Ahabw'okuba Haawa akahurikiza ekigambo ky'okutaikirizana, kirikuhanisa Ekigambo kya Ruhanga, kikatandikaho ekibi aho honyine, kandi nikikigumizamu okuruga obwo. Kandi titurikimaramu kyona na kakye okuhitsya obu baamaraika bariija bakashoroora ekyo kintu, na Ruhanga akatwara abaana Be omu Bukama, kandi enkyenzi ziryayokibwa. Yetegyereze egyo mizaabibu ebiri.

Kuri twine obwire bwingiho aha ishomo eri, kwonka n'okukwata aha bikuru kwonka, nikwo tubaase kugyendera kimwe omu kushabira abarwaire omu dakiika nkye eziraakurateho.

17 Yetegyereze, embibo zaabo zikakura hamwe buzima nk'oku Ruhanga yaagambire hanu nabwo omu shuura ya 13, y'eishomo ryaitu ekiro eki, eya Matayo eti, "Murekye bikure hamwe." Hati, Kaini akaza omu nsi ya Noodi, yaayetungirayo omukazi, yaashwera; na Abeeli yaitwa, bwanyima Ruhanga yaimutsya Seezi kuza omu mwanya gwe. Reero obusingye bwatandika kukuratana, ahagati y'ekihikire n'ekigwire. Hati, nitureeba ngu bakaba beeteerana, boona hamwe, emirundi mingi, reero kyayetaagisa Ruhanga ku . . . Bukeeyongyera kuba bubi munonga okuhitsya obu kyayetaagiise Ruhanga kubuhwerekyereza.

Kwonka aha muheru zikarugayo okuhitsya obu ezo mbibo zombi, embibo y'okutaikirizana n'embibo ya Ruhanga, zaayorekire emitwe yaazo yonyini, kandi ekyo kikabugira omuri Yuda Iskaryota n'omuri Yesu Kristo. Akuba, Akaba ari Embibo ya Ruhanga, Akaba ari obukomooko bw'ebihangirwe bya Ruhanga, Akaba atari kindi kureka Ruhanga. Kandi Yuda Iskaryota akazaawra ari omwana w'okuhwerekyerera, akaruga okuzimu, yaagaruka okuzimu. Yesu Kristo akaba ari Omwana wa Ruhanga, Ekigambo kya Ruhanga ekyorekirwe. Yuda Iskaryota, omu kutaikirizana kwe, akaba ari embibo ya Sitaane, akaija omu nsi, ahabw'okubeihabeihabe; nk'oku Kaini, ishe w'okubanza, yaabaire ari omu kutandika.

18 Yuda akaba ari omushomi kwonka omu kanisa. Buzima akaba atari w'amazima. Omu mazima akaba ataine okwikiriza; (takaabaire naareebya Yesu na kakye). Kwonka, nimureeba, akabiba egyo mbibo y'okutaikirizana. Akateekateeka ngu akaba naabaasa kunywana ensi, mamona, kandi nabwo anywane Yesu, baitu obwire bukaba

bwahweire kugira eki yaakikorera. Eshaaha y'aha muheru ku yaahikire, obu yaakora ekintu kibi eki, akatambuuka omusitaari ogurikutaanisa kugyenda omumaisho n'okugaruka enyima. Akaba naateekwa kugumizamu omu muhanda ogu yaatoiremu, nk'omubeihi. Akabiba embibo y'okutaikirizana, akagyezaho kusherura obuganzi omuri ebyo bibiina bikuru by'amadiini by'ebiro ebyo, eby'Abafarisaayo n'Abasadukaayo. Kandi yaateekateeka ngu naija kwetungira akasente, n'okukundwa abantu. Ekyo ka nikireetera abantu baingi munonga kutaaha omu kutaikirizana okwo, kugyezaho kutunga obuganzi omu bantu! Reka tutungye obuganzi ahari Ruhanga, atari aha bantu. Kwonka ekyo nikyo Yuda yaakozire obu oku kutaikirizana kubugira omuriwe.

19 Kandi nitumanya ngu Yesu akaba ari Kigambo, Yohaana Orikwera 1, neegira eti, "Bwa mbere na mbere hakaba hariho Kigambo; Kigambo ogwo akaba atuura na Ruhanga; kandi Kigambo akaba ari Ruhanga. Kigambo ogwo yaaba omuntu, yaatuura hanu naitwe." Kya kiri kityo, Ekigambo n'Embibo, bwanyima Embibo yaaba omuntu yaatuura naitwe.

Yuda ku araabe yaabaire ari embibo y'omuzigu kandi ey'okutaikirizana, nayo ekaba omuntu yaatuura naitwe omu muntu Yuda Iskaryota. Akaba ataine okwikiriza okuhikire, kw'amazima na kakye. Akaba aine oku yaabaire naateekateeka ngu n'okwikiriza. Hariho ekintu nk'okugira okwikiriza; kandi n'okwikiriza kw'ekikwangara.

Kandi okwikiriza kw'amazima kwa Ruhanga nikwikiriza Ruhanga, kandi Ruhanga n'Ekigambo, Tikurikyongeraho ekintu kyona na kakye. Baiburi neetugambira ngu ku turikwongyeraho ekigambo kimwe, nari tukacwaho Ekigambo kimwe, omugabo gwaitu guryaihwu omu Kitabo ky'Amagara, Okushuururuwa 22:18, eshuura ey'okumariira y'aha muheru.

20 Omu kutandika kwonyini, Ekitabo ky'okubanza kya Baiburi, Ruhanga akabagambira kutacwaho Ekigambo na kimwe ahari Ekyo, "buri Kigambo nikiteekwa kworoberwa," nibateekwa kutungwa ekyo Kigambo. Yesu, ahagati y'ekyo Kitabo, akaja yaakigamba omu busingye Bwe, yaagira ati, "Omuntu tatungwa by'okurya byonka, kureka n'Ekigambo kyona eki-ekiruga omu kanwa ka Ruhanga." Kandi omu busingye bw'okumariira bw'Okushuururuwa, akatuhuanuurira, ku "Weena oricwa Ekigambo na kimwe omuri ekyo Kitabo, nari Akakyongyeraho ekigambo na kimwe, omugabo gwe guryaihwu omu Kitabo ky'Amagara."

N'ahabw'ekyo tiharikubaasa kubaho ekintu kyona ekitari ky'amazima, kureka Ekigambo kya Ruhanga, eky'amazima ekitafungwire! Abo ni batabani ba Ruhanga, na bahara ba Ruhanga, abatazairwe ahabw'okukunda kw'omuntu, nari okukwatana omu ngaro, nari omuringo nanka gw'okubatiza; kureka abazairwe omu Mwoyo wa Ruhanga, n'Omwoyo Orikwera, kandi n'Ekigambo Kirikweyorekyera omuribo. Orwo n'Oruzaaro rw'amazima rwa Ruhanga.

21 Omuzigu ayegaita aha kanisa kandi aramatira aha nyikiriza nari ekintu kyona. Kwonka ekyo ti . . . Ekyo n'okutaikirizana, ekintu kyona ekirikwetaasya omuri obwo bwoko bw'Amazima agahikire g'Ekigambo kya Ruhanga.

Kandi nitumanya tutu? Tugira tuti, "Mpaho, bo, oine obugabe Kukishoboorora?" Ngaaha, sebo! Tihariho omuntu oine obugabe kushoboorora Ekigambo kya Ruhanga. Niwe Orikweshoboororera. Naakiraganisa, bwanyima Akikora, egyo niyo nshoboorora Yaakyo. Ku Araabe yaakiraganiise, bwanyima Akakihikiiriza, egyo niyo nshoboorora Yaakyo. Ekintu kyona ekirikuhanisa Ekigambo kya Ruhanga n'okutaikirizana! Buzima kwo!

Hati, nk'oku naagamba, Yuda akaba ataine okwikiriza kw'amazima. Akaba aine okwikiriza kw'ekikwangara. Akaba aine o-okwikiriza oku yaabaire naateekateeka ngu ogwo akaba ari Omwana wa Ruhanga, kwonka akaba atarikumanya ngu ogwo akaba ari Omwana wa Ruhanga. Takaakikozire. Kandi omuntu orikworobyamu omu Kigambo kya Ruhanga eki ekiri Amazima, aine okwikiriza kw'ekikwangara. Omuheereza wa Ruhanga ow'amazima aramatira aha Kigambo ekyo.

22 Ebiro bikye ebihingwire, omuheereza omwe, wa Arizona, ow'eishomero rikuru, rurangaanwa hanu omu rurembo oru, akaanyijaho yaagira ati, "Ni-niinyenda kukugorora aha kintu nanka" (Naagira nti . . .) "ku oraabone obwire."

Naagira nti, "Obu nibwo bwire burungi munonga obu ndikumanya. Kyo Rugayo kunu."

N'ahabw'ekyo yaija, yaagira ati, "Omw. Branham, noogyezaho . . . Niinyikiriza ngu ori ow'amazima kandi omwesigwa, kwonka noogyezaho kureeta omu nsi Enyegyesa y'entumwa." Kandi yaagira ati, "Obusingye bw'entumwa bukagarukira omu bwire bw'entumwa."

Naagira nti, "Ekintu ky'okubanza eki ndikwenda kukubuuza, ow'eishe-emwe mugyenzi wangye, noikiriza ngu buri Kigambo kya Ruhanga kihandiikisiibwe Omwoyo Orikwera?"

Yaagira ati, "Eego, sebo, buzima niinyikiriza."

Naagira nti, "Mbwenu, noobaasa kuunyoreka omu Kigambo ahu obusingye bw'entumwa bwahweireho? Hati, hanyorekye, ninza kwikirizana naiwe." Kandi naagira nti, "Omuhandiiki w'ebi'entumwa, ogwo owaabaire aine ebishumuruzo by'Obukama, aha kiro kya Pentekoote obu obusingye bw'entumwa butandika, bakagira bat, 'B'eishe-emwe, tukore ki kugira ngu tujunwe?' Yaagira ati, 'Mweteise, mwena mubatizibwe omu Iziina rya Yesu

Kristo, mubone kusaasirwa ebibi byanyu; kandi nimwija kuheebwa ekiconco ky'Omwoyo Orikwera. Ahakuba okuraganisibwa oku n'okwanyu n'okw'abaana baanyu, n'okw'abo abari hare, omuntu weena oryetwa Mukama Ruhanga waitu.' Hati, Ekigambo nikibaasa Kwehakanisa kita?"

Omushaija ogwo yaagira ati, "Naagira embeho nyingi ekiro eki."

Naagira nti, "Naanye, okwo nikwo ndikuteekateeka." Mwareeba?

Hati ngambira, Ruhanga na hati naayeta? Ruhanga ku araabe naakyeta, obwo obusingye bw'entumwa na hati bukiriho. Buzima! Boona abaryetwa Mukama Ruhanga waitu, abaryayetwa, abarikwija kwetwa, boona abu Aryayeta, buryaguma buri obusingye bw'entumwa, ahabw'okuba Yesu Kristo tahinduka; oku abaire ari nyomwabazyo n'eriirooba nikwo ari, kandi nikwo ariguma ebiro byona.

23 Hati, nitureeba eriizooba ngu okutaikirizana oku kukabibwa omuri buri busingye. Kuri nikibaasika kukturungu omu dakiika ikumi nari ikumi na itaano eziraakurateho, nkakikozire, kwonka timurikubaasa. Omu busingye bwona . . . Twena, abarikukira obwingi omuriitwe tushoma Baiburi. Kandi hati nk'obu Yesu yaija, Akashangaho okwo kutaikirizana, okuhakanisana. Akaba ari Ekigambo ekyorekirwe, Akaba ari okushoboorora kwa Ruhanga kw'Ekigambo, ahabw'okuba Akagira ati, "Musherura munonga omu Byahandiikirwe, ahakuba muteekateeka ngu Omuribyo nimwo mwine Amagara Agatahwaho; haza kandi ebyo nibyo Bimpamy." Nikyo ekyo. A-Akaba ari okushoboorora kw'Ekigambo. Kandi buri mutabani na muhara wa Ruhanga ozairwe obwa kabiri w'obusingye obu n'okushoboorora kw'Ekigambo. Muri ebaruha ezihandiikirwe, ezirkushomwa abantu boona. Eego.

Yetegyereze, Akagira ati, "Bandamiza busha, nibeegyesa okutaikirizana nk'Enyegyesa. Bandamiza busha, ahakuba Okwegyesa oku beegyesa n'okutaikirizana, enyegyesa y'abantu, enyikiriza z'abantu, nibabyegyesa kuba Ekigambo kya Ruhanga, kunu bitaine kakwate n'Ekigambo kya Ruhanga."

24 Reeba, buri busingye buzaara abantu nk'abo, buri busingye bukikozire, kandi n'obwaitu tibwine rwekwatso. Twine ekintu nikyo kimwe, kandi n'obusingye bukur munonga bw'abantu abo okukira obusingye obundi bwona waabuteerana hamwe, ahakuba obu n'okumariirira kw'ebayaayo by'ensi. Oku n'okutaikirizana kw'amaani munonga okurabaireho omu nsi, kuri omu nsi eriizooba. Okutaikirizana omu busingye obundi kukabaiha ahari Ruhanga ow'amazima kandi ohuriire, kwabatwara aha bishushaani ebirkuramibwa. Eriizooba, Yesu akagamba omuri Matayo 24:24 ku kuryaba kuri haihi kushushanira kimwe, kubone kuhabisa n'Entoore kyaba nikibaasika. Kyo gamba aha kutaikirizana! Oo, nikuhabisa munonga. Sitaane ari omu bantu, kandi ashongokire omu by'ediini buzima, aine diguri nyingi omu by'ediini, naabaasa kwegyesa ekyo Kigambo haihi atakozire n'enshobe. Yesu nikwo yaagambire. Kwonka muhangye amaisho kwonka, nihaija kubaho ahantu. Agire ati, "Mpaho, hati, ekyo kikaba kitari ky'eki." Oo, eego, nikyo, nakyo, mwareeba, ahabw'okuba Ruhanga akagamba atyo.

25 Reeba eki kwakozire. Okutaikirizana okwo kukareeta ekiniga kya Ruhanga omu biro bya Noa, obu Ruhanga yaayohereza nabi We kandi akabuurrira nk'omuriro ogurikwaka, yaayeta abantu kweteisa, reero okutaikirizana okwo kwarohama. Bwanyima Sitaane akakora ki? Akakurataho juba juba, omuri Haamu, yaatandika kukubiba omurundi ogundi. Ekyo kihikire buzima.

Haija Musa, nabi mukuru, kureeta Abaisraeli naabaiha omu ihamba. Hakabaho ki? Musa, nabi mukuru wa Ruhanga, naabareetera Amazima gonyini, Amazima agahamiibwe. Akaba abugaine Ruhanga. Ruhanga akahamya ku yaabaire Amubugaine. Kandi oku abantu abo enyima okwo, abo banyamurwa, baabaire baine amadiini gaabo, emigyenzo yaabo, saaviisi zaabo na buri kimwe, kwonka Musa akeemerera nk'ekirikuhamya okushoboorora kw'Ekigambo. Ekyo otakyebwa! Musa akaba ari okushoboorora kwa Ruhanga kw'okuraganisa Kwe. Akagira ngu aryakikora; akaba ari okushoboorora kwa Ruhanga.

26 Hakabaho ki? Ekanisa ekatandika kuruga Misri, yaayemerera ebiro bikye, reero haabaho ki? Sitaane akaija n'okutaikirizana kwe omu muntu, Kaini wa kabiri, orikwetwa Balamu, yaababibamu okutaikirizana. Nitumanya ngu ekyo n'amazima. Balamu ogwo, okwegyesa kwa Balamu, ngu "twena turi bamwe, nituheereza Ruhanga omwe ou murikuheereza," omu by'okuramatira aha nyikiriza, akaba ahikire, ahabw'okuba akahonga ekitambo eki Ruhanga yaahaire; empaya z'entaama mushanju, enim i mushanju aha matambiro mushanju, kandi yaashaba Ruhanga omwe kurungi munonga nk'oku Musa yaakozire okwo omu ihamba, omu buryo bumwe buzima. Kwonka bakaba batarikushushana! Kirikutworeka ekishushani ky'ebyo ebyabaire nibyenda kubaho. Aho hakabaho, omurundi ogundi, Kaini oyorekirwe omu mu-muntu Balamu. Na Ruhanga akaba ari aho ayorekirwe omu muntu Musa, naashoboorora Ebigrando Bye kurabira omu muntu, Naayemanyisa, okuragaanisa Kwe, kurabira omu muntu. Reero okutaikirizana kwaimuka.

Okwo nikwo yaakozire omu bwire bwa Yuda, ngugwo aho yaija n'okutikirizana kwe.

27 Kandi, mwijukye, ekibi eki eki abantu abo baikiriize, ngu "twena turi bamwe, nituramya Ruhanga omwe, twena tushemereire kuba ab'ekanisa emwe, tushemereire kuba abantu bamwe," ekibi ekyo tikirasaasiirwe Israeli na kakye! Yesu We wenka, akagira ati, "Boona bakafa!"

Bakahwerekyerera, boona kureka bashatu aharibo. Abo nibo abaaramatiireho kandi bakaikiriza okuraganisibwa. Abanyabwoba ku baagizire bat, "Titurikubaasa kukubuura egoy nsi, nibatukiza amaani," n'ebindi; Kalebu na Yoshua bakacureeza abantu, baagira bat, "Nitubaasa n'okukiraho kugikubuura, ahabw'okuba

Ruhanga akagituraganisa! Tindikufayo n'obu abazigu baraabe bari bata!"

Kandi na hati nitubaasa kubuurira okutamba kwa Ruhanga, n'okubatizibwa kw'Omwoyo Orikwera, kandi tukiine amaani ga Ruhanga g'okututaanisa n'ebintu by'ensi. Ruhanga nikwo yaagambire! Obusingye bw'entumwa tibukhwagaho, kandi tiburihwaho, nibugumizamu.

N'ahabw'ekyo, nitureeba ogwo mubibi owa ira w'okutaikirizana. Kandi mwijukye, ekyo kibi tikirasaasiirwe na kakye. Hati, ow'eishe-emwe, ku kiraabe kitarasaasiirwe buriya, hati biri bita obu e-embibo y'amazima y'omu busingye bwona erikwerundaanira hamwe?

28 Yetegyereze ekintu kikuru eki eki Balamu yaakozire, kikagumirizamu kimwe, kandi aha muheru kyahererukira omu kwija kwa-kwa Yuda Iskaryota, na Yesu. Kikaba kiri ki? Yuda na Yesu bakaba bari ekishushani kyonyini kya Kaini na Abeeli. Ahabw'okuba, nk'oku Yuda yaabaire ari omunyadiini, na Kaini nikwo yaabaire ari omunyadiini. Kaini akombeka eitambiro, yaatamba ekitambo, yaaramya Ruhanga, akaba ahamize omuri kyo nk'oku ondiijo oriya yaabaire ari. Kwonka, nimureeba, akaba ataine kushuuruurirwa kw'Ekigambo. Akateekateeka ngu Adamu na Haawa bakarya za apo nari ekindi kijuma. Kandi Kaini . . . Abeeli, ahabw'okushuuurirwa, akamanya ku ekyo kyabaire kigwire; ekaba eri eshagama eyaabaihireyo, reero yaatamba omwana gw'entaama. Kandi Ruhanga yaahamya ku ekitambo kye kyabaire kihikire. Bwanyima yaakwatwa eihari yaagyezaho kwita omurumuna. Kandi nk'oku yaitiire omurumuna aha itambiro niryo rimwe eri ekitambo kye kyafeereireho, omwana gw'entaama gukafeera aha itambiro, nikwo na Yuda Iskaryota yaareebeize Yesu Kristo aha itambiro rya Ruhanga, kandi Akamwita nk'oku Kaini yaitsire Abeeli. Ahabw'okuba, Kaini akaba ari embibo y'okutaikirizana.

Kandi na Balamu okwo nikwo yaabaire ari, ogwo nabi owaabaire akorera ebihembo, omushaija owaabaire ashemereire kumanya kurungi munonga. Kandi Ruhanga akamurabura kurabira omu bumanyiso n'eb'y'okutangaaza, nangwa n'endogoya neegamba omu ndimi ezitarikumanywa, kwonka nabwo akagumizamu. Akazaarwa kuba o-omubibi w'okutaikirizana.

29 Kandi Yesu ku araabe yaahanwire aha busingye obu kuhereerukira omu kutaikirizana okurukukirirayo kimwe okurabaireho, obusingye bw'ekanisa ya Laodikea, kooyakooya, Obwamuteire aheeru y'ekanisa, nikibaasa kita kuba ekindi kyona kitari okwo kutaikirizana! Buzima, nikwo. Nikuhereerukira omu busingye obwo.

Kandi akaba ari Kaini na Abeeli omurundi ogundi okwo ahari Gologosa.

Hati mwetegyereze, nk'oku kitwire, ahonaaho Yesu ku yaagyenzire, akaza omu Iguru, Omwoyo Orikwera akooherezibwa. Ogwo akaba ari egoo Mbibo, orikuha Ekigambo Amagara, nk'oku tugambire nyomwabazyo. Niwe orikuhindura Ekigambo kuba ekihuriire. Kuhindura ekihuriire nikimanyisa "kuha Amagara." Omwoyo Orikwera w'amazima aha Amagara Ekigambo eki Ari kwonka. Takaaha enyikiriza y'ediini Amagara, Takaabaasa, ahabw'okuba Tari w'enyikiriza y'ediini. Niwe Magara g'Ekigambo kya Ruhanga, ahakuba Ni Ruhanga. Mwareeba? Kandi Ahindura ogwo Mubiri kuba oguhuriire.

30 Hati mwetegyereze, nk'oku baakozire. Bwanyima, nk'oku Baiburi yaagambire, kandi-kandi Yohaana akagambira abaana be, yaagira ati, "Imwe baana bato, nk'oku mwahuriire ebya antikristo owaabaire ari ow'okwija omu nsi," ati, "na hati yaahikire omu nsi, kandi naakorera omu batarikuhrira." Hati, ekyo kikaba kiri nk'emysaka makumi ashatu ahanyima y'okwija kw'Omwoyo Orikwera. Nitureeba, Omwoyo Orikwera ku yaizire, egoo Mbibo y'amazima, Omuhi w'Amagara w'amazima w'egyo Mbibo, reero hanu haijamu okwo kutaikirizana omurundi ogundi. Kandi mwetegyereze, kukagumizamu. Kuka . . .

Ekigambo ky'amazima kikaba kyahamiibwe, abo baanabi aba ira bakaba bahamize Ekigambo kya Ruhanga kuba Amazima oku baagyenzire nibaruga omu nsi. Omuntu weena ku araabe yaashomire ahari orwo Rukiiko rwa Niika, nari Orukiiko orwabandiize Niika, ebyo biro ikumi na bitaano by'obutegyeki bw'okusheesha eshagama, obu ekyo kibiina ky'Abarooma eifo okwo kyabaire nokyenda kutaasyamu n'okukora ekigombe ky'ediini omu kanisa egoo. Baanabi bakajamu, bajwaire empu z'entaama, nibarya emboga, kandi baarwanirira ekyo Kigambo! Kwonka kikakora ki? Kikaba nikiteekwa kuba nka Kaini, kikaba nikiteekwa kuba nka Abeeli, omwe akaba naateekwa kufa. Buzima, akafa. Reero Ekigambo Kyahinduka busha omu bantu, kandi boona baayanga Ekigambo ky'amazima baatwara ebigunjano by'amadiini by'okutaikirizana by'ekanisa Enkatorika eyaabandize. Baayongyeraho paapa, baayongyeraho bishopu, baayongyeraho eki, kiri, na kiriya. Bakaihaho amakuru gonyini g'amazima ga Petero, n'aga-n'aga-n'aga Mariamu, n'a-n'agandi goona agatsigaire; reero baakora ebishushani ebirikuramibwa, kandi tibarakozire kindi kureka emikoro y'ekipagaani kuruga omu kirikwetwa ediini Enkristaayo. Kikaba kiri ki? Embibo y'okutaikirizana! Kandi omurundi gw'okubanza omu nsi ekanisa baagikoram u ekibiina, ekibiina. Kikaba kiri ki? Egyo mbibo y'okutaikirizana eyaabandize kubibwa, ekintu kirikwongyeraho, kirikucuubwaho.

31 N'oha orahuriireho, omuri Baiburi, kutarya enyama aha Rwakataano? N'oha orahuriireho, omuri Baiburi, aha kintu kyona eky'okushukaho omu mwanya gw'okubatiza, okwibika? N'oha orahuriireho ebintu ebyo, "Kasingye, Mariya" nari ekindi kintu? N'oha orahuriireho bimwe ahari obu bushema obujunzire bw'Abapurotestante aba, nabwo? Enyungu tekaabaasa kugamba ngu ebinika eine enziro. Kihikire! Kwonka, osingirwe orurbanja omu bikye asingirwe orurbanja omuri byona! N'oha orahuriireho Ruhanga naakora omu kigombe ky'ediini? Nyoreka omurundi na gumwe obu emwe yaayekoziremu ekigombe ky'ediini haza ekaguma ehuriire. Bikafa ahonaaho, kandi tibiragarukire kwimuka! Obwire buhikire kugira ngu ekintu kibeho, obwire buhikire obwa Ruhanga kukora.

Ekigombe ky'ediini kikashiisha eiziina ry'abantu.

Ekintu ekyo kikozirwe ebiro ebi. Nibashiisha eiziina ry'abantu, nibagira bati, "Oo, ekyo kibiina ky'abarikwera abeekuringa ahansi, tihaine eki baine." Kandi, ahabw'enki, n'okutaikirizana! Bugana Ekigambo butunu haza oreebe eki Kiri, oreebe Ruhanga ku Araabe naashoboorora Ekigambo Kye. Ruhanga naabaasa amabaare aga kugaihiramu Abrahamu abaana. Amiina.

32 Ekigambo kikaba kyahamiibwe kurungi munonga n'abo Bakristaayo b'okubanza, Ruhanga ka yaabajunire kuruga omuri buri kintu, n'endwara, kandi bakaba baine baanabi, baagamba omu ndimi, bazishoboorora, kandi baha obutumwa obwabaire buhamibwa kuba amazima gonyini buri kaire. Kwonka n'obu Ekigambo ekyo kyona kyabaire kihamiibwe, abantu Bakakyanga, baayakiira ekigombe ky'ediini. Ogwo ni nyina w'ebigombe by'amadiini goona.

Zombi zikuriire kimwe hati. Zikatandika kunaga embibo omurundi ogundi. Ekafa, kwonka yaagaruka yaarabya omu biro bya Luteeri, nk'oku turikumanya okuruga omu butumwa obuhairwe hanu omu kasheeshe ahari kyansya. Ekarabya omu biro bya Luteeri. Hati bakakora ki? Ahonaaho ahanyima y'omuntu ogwo mukuru kufa, bakakora ekigombe ky'ediini.

Ekarabya. Kandi nabwo omu biro bya John Wesili, obu abo Bangilikaani, n'obwo burinzi bwabo bwona obutahwaho na buri kintu bikaba bikikomire kuhitsya obu haihi kyabaire kibugire hoona, reero hakabaho ki? Ruhanga akaimutsya omushaija orikwetwa John Wesili, yaahwerekyereza ekyo kintu kyona. Ahonaaho ku yaafiire, we na Asbury n'abo abandi, n'enki ekyabairereho? Bakakora ekigombe ky'ediini, mbwenu hati baine emiringo yoona y'Abametsodisiti. Bwanyima aho haija omwe nari ondiijo, Alexander Campbell, John Smith, n'abandi.

33 Aha muheru, haabaho Pentekoote, neeruga omuri ezo zonna. Reero hakabaho ki? Bakakora kurungi, n'enki ekyabazibii? Mukagarukira kimwe omu byondo ebi mwarugiremu, omuri egoo shaabo yonyini, mwagaruka omu kutaikirizana n'okukora ebigombe by'amadiini, kyabeetaagisa kufungura Ekigambo. Kandi buri kaire Ruhanga ku yaabaire ayohereza ekintu kisya, mukaba mukyanga. Ago n'amazima! Okutaikirizana omurundi ogundi! Kandi, mwetegyereze, nk'oku ngambire ekiro kiri, ekyo kishushu kikye ky'okubanza ekyarugire omuri ogu muzi, nikihika omu mababi n'omu shisha, bwanyima kigarukye omu mushengye omurundi ogundi, reero kirugyeyo. Ekyo kishushu kikye ky'engano haihi nikishushanira kimwe n'engano yonyini, kandi tukateekateeka ngu niyo, kwonka ku orikwihamo ekishushu, tiharimu mbibo yoona omunda omwo. N'ekirikuhwera engano kukura kwonka, kandi nakyo nikifa, reero amagara gakirugiramu kimwe gaza omu ngano. Mwetegyereze, n'ahabw'ekyo beeta amakanisa agaabibire . . .

34 Nitureeba ebiro ebi ngu ago agarikwetwa amakanisa gaitu, nangwa n'Abapentekoote baitu, tukagyenda, twaremwa kumarwa, kyatwetaagisa kukora ebibiina byaitu. Buri kintu ekyatandikire, kikatwetaagisa kugira eki, kyatwetaagisa kugira eki, kyatwetaagisa kugira ekibiina ekindi. Reero omuntu ogu yaimuka, yaagira ati, "Aryaizira omu kicu ekirikwera." Ondijo yaagira ati, "Ahaa, Aryaizira aha mbaraasi erikwera." "Kare, ka tukore ebibiina bibiri." Mwareeba, niki? Kubiba okutaikirizana! Ku Ariija, oku kiriba kwona, Aryashoboorora Ekigambo Kye ku Ariija. Reka tutegyereze okuhitsya obwire obwo. Kwata e . . . Twaba nitugamba ahari ekyo, tokaatunga nangwa n'Obutumwa bw'obwire obu. Obutoosha kugamba aha bintu ebi Ruhanga arikuza kukora, nari ebi Yaakozire, kwonka okeehuzu ebi Arikukora. Okwo nikwo tukitungamu okutaikirizana.

35 Hati nitureeba ngu eriizooba amakanisa gaitu, amakanisa gaitu goona-goona gabibiire omuyaga, mbwenu nigashaaruura akasooroora. Titwine enteerane z'okushaba, titwine zaasaaviisi nk'ezi twabaire tugira. N'enki ekibaireho? Twihireho emihingo ahari buri kintu. Reeba, nangwa n'amakanisa gaitu g'Abapentekoote, gari aho gajiwire abakazi abashazire amashokye. Ekyo kikaba kitaikiriziba. Obuso obusigire erangi, baasiigire enono zaabo erangi, n'ebintu by'emiringo yoona; nooshanga omuntu aheeru hanu aine . . . nk'aba Rickies n'abandi; abashweire emirundi eshatu nari ena, kwonka bari abadiikon; bantu 'mwe, ka n'okutaikirizana! N'oburofa! Nibakikora bata? Ruhanga takaakiiriza omu Kanisa Ye, nibateekwa kuza omu kigombe ky'ediini kugira ngu bakore ekintu ekyo. Omuntu naatiina kugira eki yaakigambaho, 'habw'okuba nibabaasa kumubinga omuri ekyo kigombe ky'ediini. Ai Ruhanga, tuhe abashaija abataine kakwate n'ekintu kyona kureka Ruhanga n'Ekigambo Kye, Abaraakigambe Amazima. Buzima ekyo nikyo turikwetenga. Tukozire ki? Tubibire okutaikirizana. Tubibire omuyaga, mbwenu hati nitushaarura akasooroora.

36 Mwetegyereze ku hati barikurundaanirwa hamwe ahabw'okwokibwa. Mwayetegyereza, Yesu akagira ati, "Okubanza, muzirundaane hamwe, muzibobe enganda, bwanyima ezo nganda zonna muzite omu kirundo kimwe, reero Nzootsy." Hariho enganda nkye erikwetwa Metsodisiti, Baputisiti, Puresibateeri, Luteeri, zonna nizeerundanira hamwe omu Kibiina ky'Amakanisa g'Ensi. Niki? "Mabanze muzirundaane hamwe!" Haleluya! Mwayetegyereza, Naabanza kurundaana enkyenzi, aziiha omu ngano, azishoroora, "Muzirundaane hamwe muzootsy." Goona nigaza kwokibwa orurbanja rwa Ruhanga, ahabw'okubiba okutaikirizana omu bantu, ebintu ebi ba . . . Baine enshusha y'okutiina Ruhanga, kwonka bahakanisa Amaani ge, bahakanisa Ekigambo, kugira ngu baramatire aha migyenko y'ediini nanka, n'ebigunjano by'ediini nanka ebi omuntu yaataahizemu, naagyezaho kubita omu Kigambo kya Ruhanga. Tikikaakora. N'okutaikirizana.

37 Ningamba n'eiraka rihango eriizooba, nk'oku kyabaire, nka nabi ogwo mukuru owa ira munonga, Amosi, obu

yaashuumma omu Rurembo orwo, akagira ati, "Tindi nabi, nari omwana wa nabi. Kwonka entare ku erikutsinda, n'oha orikubaasa kwezibira kutiina!" Yaagira ati, "Ruhanga ku arikugamba, n'oha orikubaasa kwezibira kuhanuura." Akaranga orubanja aha busingye obwo, yaagira ati, "Ruhanga ogwo ou murikugira ngu nimuheereza naija kubacwekyereza."

Eki mukihandiikye, kiri aha rutambi rw'amaraka, kandi mwijukye. Ruhanga ogwo ou . . . Abantu aba hati abarikurundaana eri shaaruura ryona rihango munonga ry'O-ry'Orukiiko rw'Amakanisa g'Ensi, kandi nimuteekwa kurutaahamu. Timurikubaasa kuguma aheeru yaarwo. Nimwija kurugamu buri muntu okwe, kitari ekyo nimwija kurutaahamu. Tokaagumaho otaine rubaju rwona. Nikaija kuba akamanyiso k'enyamaishwa. Tihaine muntu owaabaire naabaasa kugura nari kuguza, kureka ogwo oine ako kamanyiso, nari oine okwo kutaikirizana. Hati, kurugyemu! Kurugyemu! Kuhungye! Kugyendere hare! Ruhanga ou barikugira ngu nibaheereza naija kubacwekyereza. Ogwo Ruhanga mukuru wa rukundo otarikubaasa . . .

Nibagira bati, "Eego, Yesu akashaba ngu twena tushemereire kuba bamwe."

38 Kyaba kiri kityo nabwo Akagira ati, "Nimubaasa kugyenda hamwe muta, babiri kugyenda hamwe, bataikirizaine?" Akagira ati, "omwe," nk'oku We na Ishe bari Omwe. Kandi Ishe akaba ari Kigambo, Nawe akaba ari Ekigambo ekyorekirwe. Akaba ari "Omwe" na Ishe, ahabw'okuba Akaba ari okweyoreka kw'Ekigambo kya Ruhanga ekyaraganisiibwe. Kandi nikwo kiri ebiro ebi, nari ebindi biro byona. Eego, sebo. Ogwo Ruhanga n'Omwe. Naayenda ngu tube bamwe.

Nikibaasika kita aba kuba bamwe, kunu ogu naahakanisa okuzaarwa oshugaine, kandi ogu naakwikiriza, naahakanisa okutamba kwa Ruhanga, hamwe n'ogu, n'oriya, boona bari omu ruzambiira nk'orwo? Bamwe omuribo nangwa tibarikwikiririza n'omuri Ruhanga, tibarikwikiriza ngu akaba ari Omwana wa Ruhanga; nibaikiriza ngu Akaba ari mutabani wa Yosefu, owaayetsirwe Omwana wa Ruhanga. Buzima. Ezo mpasha z'Abaluteeri, z'aba Zwingili, niziikiriza zityo, ngu buzima Akaba ari omuntu murungi kwonka. Aba Christian Science nibagira ngu Akaba ari nabi, omuntu w'obutoosha kusha, Akaba atari Ruhanga. Ahabw'enki, ku Araabe yaabaire atari Ruhanga, n'Omubeihi orikukirayo ou ensi eragizire. Akaba ari Ruhanga kitari ekyo Akaba atari kintu kyona. Akaba ari Ruhanga! Akaba ari Ruhanga, We wenka, owaabaire omuntu omuriitwe, omu muntu orikwetwa Omwana wa Ruhanga. Buzima, ekyo nikyo Yaabaire ari.

39 Hati nitureeba okutaikirizana kutaahiremu. Nitumanya ngu kuri hanu, tihariho orikubaasa kukihakanisa. Oo, mugyenzi! Mwetegyereze. Naija kucwekyereza ekyo kibiina ekirikugira ngu nikiheereza Ruhanga. Iwe okireebe.

Ruhanga akabyara Embibo Ye. Nimpendera, 'habw'okuba n'obwire bw'okutandika orunyiriri rw'ab'okushabira. Ruhanga akabyara Embibo Ye, kandi Embibo Ye ni Kristo. Ninja kubuurira ahari ekyo ahanyima y'ebiro bikye, ahu Ruhanga yaashaziremu kuta Eiziina Rye, Mukama ku araakunde, obundi ahari kyantsya emwe ku ndaatunge obundi bwire bukye. Reeba, Niwe Muhanda gwonka gw'okuhungiram. Niwe Mutegyeki mukuru w'amazima wenka. Niwe Ruhanga w'amazima wenka, tihariho ondijo kureka We. "Ndi Ruhanga, kandi Ruhanga wenka," Nikwo yaagambire. Yesu akagira ati, "Eki nikyo kiragiro: Hurira iwe Israeli, Niinye Mukama Ruhanga waawe, Ruhanga omwe wenka. Ndiwe. Ahabw'enki nimusherura ondijo? Ondijo aryajia . . . Nyizire omu Iziina rya Tata, Timwanyakiira. Kwonka ondijo aryajira omu iziina rye wenka, kandi we muryamwakiira." Kandi bakakikora ahari Niika.

"Ori Omukristaayo?"

"Ndi Omubaputisiti."

"Ori Omukristaayo?"

"Ndi Omupentekoote."

"Ori Omukristaayo?"

"Ndi Omumetsodisiti," eiziina erindi.

40 Kwonka ku kirikuhiha aha Iziina eryo erya "Yesu Kristo," nibarigyendera hare nk'oku barikubaasa, tibarikwenda kugira akakwate koona Naryo, ahakuba We ni Kigambo kandi Ekigambo Kyemanyisa. Mwetegyereze, Omuhanda gwonka gw'okuhungiram! Niwe Kimuri kya Rooza ekya Sharooni, Baiburi neegira ngu Niwe. Buri kitinisa (omuri Baiburi) kya Ruhanga n'ekya Yesu Kristo. Akaba ari Alufa, Omega, Obutandikiro n'Obugarukiro; Ogwo Owaabaire Ariho, Oriho, kandi Oribaho; Ekitsitsa kandi Omwana wa Daudi, byombi Ekitsitsa kandi Omwana wa Daudi; Enyonyoozi y'omu Kasheeshe, Ekimuri kya Rooza ekya Sharooni, Eirebe ry'omu Ruhanga, ogwo Alufa, Omega, Tataitwe, Omwana, Omwoyo Orikwera, byona omuri Yesu Kristo! Akaba ari okweyoreka okwijwire kwa Yehova Ruhanga owaabaire omuntu akatuura naitwe. Buzima ekyo nikyo Yaabaire ari.

Akaba ari Ekimuri kya Rooza ekya Sharooni. Ekimuri kya Rooza ekya Sharooni bakakikora ki? Bakakikaamuura, Baakihondahonda, Kukiihamu omugaju. Ekimuri kirungi kya rooza nikiteekwa kukaamuurirwa kimwe kwihamu omugaju omuri ekyo kimuri. Ago gakaba gari Amagara marungi, tihakabahoga amagara

agaaratwirwe nk'Ago, kwonka Gakaba nigateekwa kukaamuurirwa kimwe ahari Gologosa.

41 Mwareeba, bakatwara a-amajuta g'Ekimuri kya Rooza ekya Sharooni baagashuka ahari Aaroni, akaba naateekwa kushukwaho ago majuta ahabw'okuza omu maisho ga Mukama omu mwanya ogurikwera, omu mukingo ogurikwera. Akaba naateekwa kushukwaho amajuta g'Ekimuri kya Rooza ekya Sharooni, kutaahamu kumiisiira ekitebe ky'okusaasira buri mwaka. Kandi akaba naateekwa kushukwaho ago majuta, omugaju ogurikutaamirana ahari Mukama, aine eshagama y'omwana gw'entaama omu maisho ge, nawe aherize kumiisiirwaho n'omwana gw'entaama. Amakoma-mahanga n'amajugo okwehinguririza ebijwaro bye, akaba naateekwa kuribata omu muringo nanka, nibyeshongora biti, "Mukama n'orikwera, n'orikwera, n'orikwera."

42 Mwetegyereze, Niwe ekyo Kimuri kya Rooza ekya Sharooni, ogwo Mugaju ogurikutaamirana, okwo Kushukwaho aha bantu Be. Torikubaasa kwija omu maisho Ge n'eniyikiriza yoona y'ediini, ekintu kyona ekindi, kureka oshukirweho amajuta g'ekyo Kimuri kya Rooza ekya Sharooni, Ekigambo. Nabwo Niwe Eirebe ry'omu Ruhanga.

Hati, enjaayi ogitunga ota? Otunga enjaayi ku orikukwata eirebe okarikaamuurira kimwe, nootunga enjaayi. Baadokita bagikozesa omu bishengye byabo by'okukyebereramu. Kwata omuntu orwaire okwekanga kandi orabanisiibwemu, nari omukazi, orikuteekateeka ngu yaaza nk'okugwa-iraro, naagyendagyenda omu kibuga naayamuza, akwatsirwe emizimu, dokita naakwata enjaayi ye nkye y'eirebe agimuteere omu mukono nari omu mutsi ahantu nanka, nari omushaija, reero batebeekane. Nikimara omu kaanya kakye. Kwonka ahonaaho egyo njaayi ku erikuhwamu, bagaruka kuba kubi ogundi murundi, baba kubi okukira okubanza.

43 Kwonka kambagambire, banywani, egyo neeshushanisa kwonka Enjaayi y'amazima ei ndikumanya okuruga omu Irebe ry'omu Ruhanga. Niwe Eirebe ry'omu Ruhanga. Akakaamuurwa ahari Gologosa. Yaahutaazibwa ababw'ebi'okushiisha byaitu, emihiririzi Ye niyo yaatukirize. Omuri okwo, okwo kukaamuurwa kw'ebimuri, Akaba ari Ekimuri. Akaba ari Ekimuri kikuru munonga ekiramezire, n'Eirebe eri ry'omu Ruhanga, n'Ekimuri kya Rooza ekya Sharooni kikuru eki. Hati Naareereeta ekiro eki, abambirwe ahagati y'Eiguru n'ensi, niinyikiriza, Akaba ari atyo obwire obwo, naaba nimmanyisa, o-okwhiaho ekibi ky'ensi n'okugarura okutamba omu nsi. Kandi Baiburi neegira ngu Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona.

44 Munywani, Ruhanga ku yaagambiire Musa, omu ihamba, owaabaire Na-Naamushushanisa, kuhanika enjoka y'omuringa. Kandi omuringa nigujwekyera ekibi ekicwereirwe orubanja, enjoka neejwekyera, enjoka y'omuringa neejwekyera "ekibi ekyaherize kucwerwa orubanja." Nk'oku, omuringa guri "okucwa orubanja kwa Ruhanga," nk'eitambiro ry'omuringa ahu ebitambo byabaire biteebwa. Kandi na Eliya akareeba ahaiguru yaagira ngu Eiguru rikaba riri nk'omuringa, okucwa orubanja kwa Ruhanga aha ihanga eritarikwikiriza eryabaire rigarukire enyima rirugire ahari Ruhanga. Omuringa nigujwekyera orubanja, okucwa orubanja kwa Ruhanga. Kandi enjoka ekaba neejwekyera ekibi ekyaherize kucwerwa orubanja; kandi Yesu akaba ari egyo njoka owaahindukire ekibi ahabwaitu kandi Ruhanga Yaamucwerwa orubanja. Akahutaazibwa ababw'ebi'okushiisha byaitu, yaahondahondwa ababw'okutahikiirira kwaitu; okuteerwa kw'okutureetera obusingye niwe Yaakuteirwe, kandi emihiririzi Ye niyo yaatukirize.

45 Oo, Ruhanga aine kabada Ye ejewire Enjaayi, ekiro eki, ahabwawe. Omukuristaayo omunywani, orwaire kandi nooshaasha. Oo, oruhire, ebintu bikugumiire munonga. Tokaabaasa kubigumisiriza obwire buraingwa, noijs-noija kugwa-iraro omu bwire obu bw'omurembe obu tutwiremu.

Ebyo muhuriire Life Line ekiro eki, ekyo eki bagambire, ngu-ngu Russia neegamba, omu gwa '55, ngu nibaija "buzima kutegyekyera kimwe ensi yoona"? Ekyo kitakabaireho, Okutwarwa nikuteekwa kubaho. Mbwenu noogira ngu kwiriire haihi okwingana ki, munywani? Kuri hanu kwiriire haihi munonga.

Tomusherura ekiro eki n'omutima gwawe gwona? Niwe Eirebe ry'omu Ruhanga, kandi Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Ari hanu ekiro eki Kweimutsya omu bantu Be, nk'oku Musa yaahanikire a-akamanyiso k'ekibi, kicwereirwe orubanja. Kandi ti kibi kyonka, kureka n'endwara. Mwijukye, Yesu akagira ati, "Nk'oku Musa yaahanikire enjoka y'omuringa, nikwo n'Omwana w'omuntu ashemereire kuhanikwa." Musa akagihanikira ki? Ahabw'ekibi, obutaikiriza, n'endwara. Yesu akahanikwa, nawe, ahabw'ekibi, endwara, n'obutaikiriza. Akaba ari ekintu ekyo.

46 Hati, ekiro eki, omu bwire obu twine okutaikirizana kuhango oku, Yesu Kristo akaraganisa omuri Luka, ngu omu biro by'o . . . Mukama Atakaizire, nibiija kuba nk'oku byabaire biri omu biro bya Sodoma, kandi obu Omwana w'omuntu Aryeshuuruura, nk'oku Omwana w'omuntu Yaayeshuuruuriire Abrahamu eifo okwo; Elohimu, Ruhanga, owaabaire omuntu omu bantu, akatuura okwo na Abrahamu kandi akamworeka, akamugambira ebi Saara yaabaire naateekateeka (ashutami enyima Ye) omu ihema, ou Yaabaire atakareebaga. Yaamugambira ebi Saara . . . Kandi yaamweta omu iziina rye, "Saara." "Abrahamu," ritari-ritari iziina rye Abramu, eri yaatandikire naryo, kureka Abrahamu. Atari Sarai, S-a-r-a-i; kureka S-a-a-r-a, "Saara, omukazi waawe arahi?

Yaagira ati, "Ari omu ihema enyima Yaawe."

Yaagira ati, "Ninza kukutaayaayira okurugiirira aha bunaku bw'amagara." Saara yaasheka. Yaagira ati,

“Ahabw'enki yaasheka?”

Hati, Yesu akagira ati, “Okutaikirizana kw'amaani oku kutakarundaiwe kandi kukookibwa, ngu Omwana w'omuntu naija Kweshuuura omu muringo nigwo gumwe nk'oku Yaakozire buri.” Kandi ekyo ni . . . Niki? N'okwimukibwa, busya, omu maisho gaanyu, ku Yesu Atahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Nimukiikiriza? Reero ka twinikye emitwe yaitu tushabe.

47 Ruhanga Omukundwa, Nitukukunda. Ekigambo Kyawe n'e-N'ekiihuro kikuru munonga ahariitwe, Mukama. Nitukikunda buzima! Nikitubaisaho, Mukama. Nooshusha oti tikukaabaasa kwiguta na kakye. Buzima nitukunda kushutama aha meeza Yaawe, haihi n'Ekigambo Kyawe, reero tukashemerererwa egoy migisha, Mukama, ku tuteeranira hamwe bati, ab'eishe-emwe n'ab'eishe-emwekazi abaaguzirwe Eshagama y'Omwana wa Ruhanga, abo abaaguzirwe Eshagama Yaawe. Mbwenu twaija hanu ekiro eki, Mukama, tuheireyo nyekiro ezi ahabw'okushabira abarwaire. Kandi nk'oku Ebyahandiikirwe bigira, Okagira ngu “ahabw'egyo mihiririzi tukakira.” Tikirikwetaagisa kushaba kyaba kiri kityo (kureka okwatura ebibi byaitu), ahakuba emihiririzi Yaawe niyo (obwire obwahingwire) yaatukirize. Oo, ka n'ekiro ky'okujunwa! Ka n'o-ka n'okuraganisa kwa Emanuel! Buzima ekyo n'Amazima.

Okagira oti, “Hatsigaire omwanya mukye, ensi Okutandeeba bundi; kwonka imwe Muryandeeba, ahabw'okuba Ndyia” (okwegambaho ati “Ndyia”) “Ndyaba ndi hamwe naimwe, nangwa n'omuriimwe, okuhitsya aha muheru gw'ensi.” Kandi n'aha muheru gw'obwire, okumariirira kukuru oku, Okagamba, ku hariba habuzireho omwanya mukye kikabaho, ngu biryaba nk'oku byabaire omuriro gutakagwire omuri Sodoma gukootsyia ensi y'Abanyamahaga, ngu hakaba nihaza kwija okushuururwa omurundi ogundi kw'Omwana w'omuntu nk'oku kyabaire okwo omuri Sodoma. Taata, nkaabaasibwa ki abantu batakifeerwe.

48 Kandi ninshaba, Ai Ruhanga, nk'ekintu kikye ekiryaho, (ku ndaabe naagamba kubi, nsaasira), okutamu giya. Nimbakunda, Mukama. Ni-ninshaba ngu batakifeerwa. Reka egi ebe emwe ahari zaanyekiro nkuru, Mukama. Ka buri murwaire, orikubonabonesibwa, empumi, weena ori omu hanu, Mukama, akire ekiro eki. Ninshaba ngu buri musiisi ajunwe. Omu mitima yaabo honyini hati, ku baraabe bari abatarikwikiriza, ka baikirize Kristo amagingo aga. Kikore, Taata. Byona biri omu mikono Yaawe. Nitukwehongyera, Okukureeba noija omuriitwe.

Kandi Okagamba, omuri Yohaana Orikwera 14:12 oti, “Orikuunyikiriza, emirimo Ei nkora nawe aryagikora.” Ka nitumanya ngu Okeemanyisa abantu, ahakuba Okaba ori Nabi ori ou Musa yaagambire ngu aryaimuka. Bakaba bamazire emyaka amagana n'amagana bataine nabi, okutaikirizana kukaba kuri hoona hoona, kwonka nabwo Ekigambo kya Ruhanga kikaba nikiteekwa kuhikiirizibwa; n'ahabw'ekyo Kigambo yaaba omuntu, kandi n'okutaikirizana kwaba omuntu. Kandi, Taata, nitukireeba omurundi ogundi ebiro ebi, okutaikirizana nikuhinduka enganda emwe mpango munonga; kandi nitureeba Ekigambo nikiija omu muringo nigwo gumwe. Tuhe omugisha ekiro eki, Taata. Nitukwehongyera, hamwe n'Ekigambo Kyawe. Eki Orikwenda kyona ngu tukore, kikore naitwe, Mukama. Omu Iziina rya Yesu. Amiina.

49 [Ow'eishe-emwekazi yaagamba omu rundi rurimi. Ekiweka ky'orutambi rw'amaraka ekirihobusha -Omur.] Titwamanya eki Yaagamba. Naabaasa kuba arikwenda kutugambira ekintu, n'ahabw'ekyo mwecureeze munonga akaanya kakye. [Ekiweka ky'orutambi rw'amaraka ekirihobusha. Ow'eishe-emwe yaaha okushoboorora -Omur.]

Amiina. Murashomireho [Ekiweka ky'orutambi rw'amaraka ekirihobusha -Omur.] Ekyahandiikirwe ahu abazigu baabaire nibaija, kandi boona bakaba beeteraniire hamwe, kandi ba . . . abazigu bakaba bari eihe ry'amaani munonga. Reero Omwoyo wa Ruhanga yaashuma aha muntu omwe, yaamugambira, nawe yaaragura, yaabagambira ah'okuza kugwera, batyo baacwekyereza abazigu baabo. Nkikyo aho kyagaruka. Ogwo nigwo mwanya gw'okucwekyerezamu omuzigu waawe, waareeba, kwata omukono gwa Ruhanga. Omukono gwa Ruhanga ni Kristo, tihariho kubanganisa, Ekigambo, n'ahabw'ekyo Ekyo mukitware omu mitima yaanyu ekiro eki obwo turiyo nitweta orunyiriri rw'ab'okushabira.

50 Niinyikiriza ngu Billy agarukire yaagaba zaakaada z'ab'okushabira eriizooba. B, za B, ka tukwate B, makumi munaana na itaano. Nyomwabazyo ekiro, twetsire ikumi na bataano nyomwabazyo ekiro. Tukira kugyezaho kweta nka ikumi na bataano buri nyekiro. Reero mukwate zaakaada zaanyu, nituza kuzihikaho, hati. Reka tugeyeho nka ikumi na itaano. Makumi munaana na itaano. B, nka Branham, noomanya. B, makumi munaana na itaano okuhika ahari igana. Kandi ni . . . Reka tureebe, n'oha oine B, makumi munaana na itaano, imutsya omukono gwawe. Noohamya . . . Oo, okwo enyima, kare, makumi munaana na itaano rugayo.

Hati, mutabani wangye . . . N'ahabw'ekyo obundi harimu abagyenyi hanu, abatakaamanya oku eki kikozirwe. Mutabani wangye aija hanu, nari omuntu ondijijo; ku aba atabaasize kwija, Ow'eishe-emwe Borders, omuntu ondijijo weena. Omuntu omwe aija, akwata zaakaada ezi, igana aharizo, ayemereire omu maisho g'abantu azijwanga hamwe. N'ahabw'ekyo naakuha kaada, tarikubaasa kukugambira ngu nooza kwetwa kwija hanu aha kituuti, ekyo tarikukimanya. N'obu yaakuba nyowe tindikukimanya. Nyija omu kiro, nyihamu nka ikumi nari ikumi na itaano, omubaro nk'ogwo, omuri ezo kaada. Ekyo tikiine kakwate koona n'okutambirwa kwawe. Noobaasa kushutama aho honyini. Reeba, nyomwabazyo ekiro. Ni bangahi ababaire bari hanu nyomwabazyo ekiro, ka tureebe emikono yaanyu? Abantu ka batambiirwe hoonahoona omu ruteerano!

51 Hati, egyo ebaire eri makumi munaana na itaano, makumi munaana na mukaaga, makumi munaana na mushanju, makumi munaana na munaana, makumi munaana na mwenda, makumi mwenda. Ka baije hati hati. B,

makumi munaana na itaano, makumi munaana na mukaaga, makumi munaana na mushanju, makumi munaana na munaana, makumi munaana na mwenda, makumi mwenda. Ogwo akaabaire omwe . . . Buzima, nitwetenga . . . Kandi omuntu ku araabe . . . Hanu hariho ondijjo, eego, ekyo nikituma kyahika. Makumi mwenda, makumi mwenda okuhitsya ahari igana hati. Makumi mwenda, makumi mwenda n'emwe, makumi mwenda na ibiri, makumi mwenda na ishatu, makumi mwenda na ina, makumi mwenda na itaano, makumi mwenda na mukaaga, makumi mwenda na mushanju, makumi mwenda na munaana, na mwenda.

Ku oraabe otarikubaasa kushembuka, ku oraabe . . . Nindeeba twine bakye, obugaari bushatu bw'abarwaire hanu hati, buna, ningira, nindeeba. Ku oraabe oine kaada y'okushabirwa, egyo ku-ku eraabe eri enamba yaawe eyaayetwa, hazza otarikubaasa kushembuka, imutsya omukono gwawe kusha, nituza kukutsindika ohikye hanu.

52 Kandi ku oraabe otaine kaada y'okushabirwa, shutama aho kwonka oshabe, ogire oti, "Mukama Yesu, ka-ka-k'abe nyowe ekiro eki." Ni bangahi omu hanu abataine kaada y'okushabirwa, mwimutsye emikono yaanyu. Oo, mugyenzi! Kare, hati ka tugambe eki, nyine amatsiko ngu tikiraahurirwe nk'okurogota. Kwonka rimwe hakaba hariho omukazi mukye owaabaire ataine kaada y'okushabirwa, ka tukigambe tutyo. Akagyenda naayemigisiriza omu mutwe gw'abantu, yaagira ati (hati muhurikize mutaireho omutima), "Kuri nimbaasa kukwata aha bijwaro by'Omushaija oriya, ninkira." Ni bangahi abarikumanya ekyabaireho ekyo? Ni kirungi. Kandi ogwo mukazi akakora ki? Akamukoraho, yaaza hangahari yaashutama ahansi. Reero Yesu yaahinduka, Yaamanya ahu ogwo mukazi yaabaire ari. Tikwo kiri? Akamanya omurabanamu gwe. Ekyo kihikire? Akamanya omurabanamu gwe, n'ahabw'ekyo Yaamugambira omurabanamu gwe. Kandi akeehurira omu mubiri gwe ku ekyejwiso kyayoma. Ekyo kihikire? Ahabwa nshonga ki? Akamukoraho.

53 Hati, n'Abakristaaayo bangahi hanu ekiro eki abarikumanya, okurugiirira omu Baheburaayo, Ekitabo ky'Abaheburaayo, ngu Yesu hati hati n'Omunyamurwa Omukuru, Omunyamurwa Omukuru orikubaasa kusaasira hamwe naitwe omu bweremwa bwaitu? Niwe? Kare, ku Araabe ari ogwo Munyamurwa Omukuru, ofiisi egypt, Omunyamurwa Omukuru, obwo Akaatwaza ata? Akaatwaza nk'oku yaatwaize obwire buri. Ekyo nimukiikiriza? Akaatwaza nk'oku Yaatwaize buri, ku muraabe nimubaasa kwikiriza ekintu ekyo. Kare. Ni bangahi abarikwikiriza ekintu ekyo, imutsya omukono gwawe, ogire oti, "Omu mazima ninkiikiriza"?

Kare, batakagiire omu runyiriri rw'ab'okushabira, ka tugireho orunyiriri rw'ab'okushabira ahu muri aho. Nimmanya ngu Ari hanu. Ni-Ni-Nimpurira Okubaho Kwe, kandi ni-nimmanya ngu Ari hanu. Ija. Orunyiriri rw'ab'okushabira rwatebeekanisiibwe? Naaba ninja kweta okwo. Imwe-mushabe kwonka, mureebe hanu kwonka reero mushabe, mwikirize kwonka.

54 Omukazi mukye ashutami hanu ampangire amaisho, ashutami aha rubaju rw'omukazi ojwaire gaarubindi. Timurikureeba Ekyo ekirikuzeereera ahaiguru y'ogwo mukazi? Reeba hanu. Mwareeba? Aine oburwaire bw'omutima. Noikiriza ngu Ruhanga naakukiza? Ku oraabe noikiriza, imutsya omukono gwawe. Ogwo nigwo gubaire guri omurabanamu gwawe. Ekyo kihikire. Hati ogwo ku guraabe nigwo gubaire guri omurabanamu gwawe, imutsya omukono gwawe nikwo abantu babaase kureeba, imutsya omukono gwawe batyo. Hati, tokigwine bundi hati. Okwikiriza kwawe kwakukiza.

Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Oo, hariho okutaikirizana; kwonka Yesu Kristo tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Eki ni . . . Hati mugumizemu nimushaba kwonka, mwareeba, tikirikukwetaagisa kuba haruguru hanu, ngu obaase kumanya.

55 Hati, ogu n'omukazi. Okurugiirira omu kumanya kwangye, tinkamureebaga omu magara gangye, n'omukazi oyemereire hanu kwonka, aine kaada y'okushabirwa, kandi obaire otarikumanya yaaba obaire nooza kwetwa nari otaraayetwe. Omuntu afiire kukuha kaada y'okushabirwa, mbwenu enamba yaawe-yaawe yaayetwa, n'ahabw'ekyo waafa kwija haruguru hanu. Tikwo? Kandi tiinyine buryo bwona bw'okukumanya, eiziina ryawe, ei orikuruga, eki orikwenda, tiinyine kyona eki ndikukimanyaho. Ndi omushaija kwonka, iwe ori omukazi. Ekyo kihikire. Ekishushani eki rimwe kikabaho omuri Baiburi, Yohaana Orikwera, eshuura ya 4.

Hati nimugira muti, "Waakora ki, Ow'eishe-emwe Branham, obwire obwo, omwanya mukye ogwarabaho?" Ntairemu egypt giya nkye kwonka, mwareeba. Tindikumanya, mwareeba. Naateekwa kukikora. Tindikumanya. Ogwo mukazi aho yaakora ata? Tinkareebahoga ogwo mukazi omu magara gangye. Ni musya kyarimwe ahariinyye. Niinyikiriza abaire ari omukazi. N'oha owaheza kutambirwa hati hati okwo omu bateeraine? Noobaasa . . . Yee. Titurikumanyana. Ekyo ku kiraabe kiri amazima, huuba omukono gwawe oti. Mwareeba? Tinkareebahoga omukazi ogwo. Kwonka yaaba ashutami aho, naikiriza. Hati, hariho Ekintu eki yaakoraho, tikwo? Tihaine eki kyakukugasira kunkoraho.

56 Kwonka hati timurikureeba ku Baiburi buzima eri Ekigambo kya Ruhanga? Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Nituba amahema g'ogwo Mwoyo Orikwera niwe Kristo. Mwareeba? Egyo niyo Mbibo y'amazima. Reero Omwoyo Orikwera ogwo w'amazima ku arikutaaha omu Mbibo y'amazima y'Ekigambo, kitari . . . Teekaatwara ekicweka Kyakyo (ahabw'okuba, Ekyo Sitaane naakikozesa), nooteekwa Kukikwata kyona, waareeba, buri Kigambo Kye; 'habw'okuba, Tari Ruhanga ekicweka, ni Ruhanga weena. Mwareeba? Kandi ekyo nikyo kibaho.

Hati, hanu hariho omukazi, tinkamureebaga. Yesu akabugana omukazi nk'ogu rimwe, obundi embeera teri emwe, tindikumanya. Kandi Akaba ashutami aha iziba. A-Akahurira ashemereire kushuuma Samaria. Kandi nitureeba ngu, Samaria ekaba eri ahansi y'akabungo. Kandi-kandi Akaba naaza Yeriko, nimmanyisa, Yaayetooroora yaaraba Samaria, reero yaahika omu rurembo rwa Sukaara. Atyo Yaashutama ahansi aha iziba, yaatuma abeegi Be kugura eby'okurya.

57 Hariho enganda z'abantu zingahi omu nsi? Ishatu. Abantu ba Haamu, Sheemu, na Yafeesi. Twena tukakomooka ahari Noa. Kandi abantu boona abaatsigaire bakahwerekyerezibwa obwire obwo. Enganda ishatu z'abantu zonka, ogwo n'Omuyudaaya, Omunyamahanga, n'Omusamaria (owaabaire ari mareeto w'Omuyudaaya n'Omunyamahanga). Kandi ezo nizo nganda zonka eziri omu nsi, mwareeba, ishatu zonka.

Buri kintu omuri Ruhanga kihikiirira omuri ishatu. Nk'ebi bishatu ebi naaba ningambaho ekiro ky'eriizooba: ebicweka bishatu by'okutaikirizana, ebicweka bishatu by'Ekigambo ekyabaire omuntu, n'ebindi. Mwareeba?

Hati, kandi Ogwo-Ogwo owaagambire n'Abayudaaya, akagambira Filipo, ku yaareetsire Nasanaeli, ahu yaabaire ari, kandi yaagira ati, "Mureebire obu abaire ari ahansi y'omuti." Yaagambira . . . Anderea akaba areetsire Petero, Yaagira ati, "Eiziina ryawe ori Simooni, kwonka noija kwetwa 'Petero' okuruga hati n'okugumizamu." Yaagira ati, "Ori mwene Yona." Mwareeba? Hati, abo boona bakaba bari Abayudaaya.

Kwonka hanu Yaaza aha Munyamahanga . . . ti Munyamahanga, kureka Omusamaria.

Hati n'obwire bw'Abanyamahanga. Akaba atakakoraga ekintu ekyo nangwa na rimwe aha Banyamahanga. Sherura omu Byahandikiirwe. Nangwa na rimwe. Kwonka Akaraganisa, omuri Luka 22, ngu Aryakikora Okwija okwo kutakabaireho.

Kwonka Akashutama ahansi aho, reero ngu hanu haija mareeto w'Omuyudaaya n'Omunyamahanga, omukazi. Kandi Yaamushaba ati, "Mukazi we, Mpa eky'okunywa."

Omukazi yaagira ati, "Ahabw'enki, toshemereire kugashaba, ago. Turi . . . Hariho okushoroora hanu. Ori Omuyudaaya, kandi-kandi ndi Omusamaria."

Yaagira ati, "Kwonka kuri noomanya Ou orikugamba nawe, Okanshabire eky'okunywa." Akaba Naakora ki? Akaba naakoragana n'omwoyo gwe. Kandi ahonaaho ku Yaamanyire omurabanamu gwe, mpaho, Akamugambira ngu agyende areete iba. Yaamugarukamu ngu taine n'omwe. Nawe yaagira ati, "Ago n'amazima, okashwerwa bataano."

58 Hati, reeba, Abafarisaayo ku Baamureebire naakora ekyo. Buzima, okwo kutaikirizana kuri omu Kigambo honyini, bakagamba ki? Bakagira bat, "Omuntu ogu ni Belezebuli, omuragazi." Mwareeba?

Kandi Yesu akagira ati, "Omuntu weena origamba ekintu ekyo aha Mwoyo Orikwera ku Ariija kukakora ekintu nikyo kimwe, tarisaasirwa." Nkukwo aho okutaikirizana kwawe. Mwareeba? Kwonka Akagira ngu Naija kubasaasira obwire obwo, ahabw'okuba Omwoyo Orikwera akaba atakaizire; ekyo Kitambo, Omwana gw'entama akaba atakafiire.

Kwonka obwo ogwo mukazi tarateekateekire ekyo. Ogwo mukazi akagira ati, "Sebo, naayetegyereza ku Ori nabi." Bakaba bamazire emyaka amagana bataine nabi. Yaagira ati, "Naayetegyereza ku ori nabi. Hati, nitumanya ngu Mesia, orikwetwa Kristo, ku Ariija, okwo nikwo Arikora."

Mbwenu, ekyo ku kiraabe nikyo Yaakozire, N'ahabw'ekyo Tahinduka, oku abaire ari nyomwabazyo n'eriizooba nikwo ari. Okwo nikwo Yaayemanyiise obwire obwo, tikwo kiri n'eriizooba? Nikiteekwa kuba kityo! Hati, hanu hariho omukazi n'omushaija abaabugana omurundi ogundi. Omukazi ogu tari mukazi ori, naanye tindi Mushaija ori. Beitu Omwoyo Orikwera ogwo ari hanu, kandi akaraganisa ngu emirimo ei Yaakozire, naitwe turyakora ekintu nikyo kimwe omu biro ebi Omwana w'omuntu arishuururuwa.

59 Hati, tindikukumanya (kandi noomanya ngu ago n'amazima), titurikumanyana na kakye, kandi oyemereire hanu. Hariho bimwe . . . Obundi oine omurabanamu, obundi tiguriho, tindikumanya. Kwonka Mukama Yesu ku aranshuruurire, okurabira omu Mwoyo We Orikwera, omurabanamu gwawe, obwo noikiriza ngu Ogwo n'Omwana wa Ruhanga, ti muntu? Eki n'ekishushu kyonka, orusisira oru oru-oru Ruhanga arikuzesa, weena ou Atooraine. Ekyo A-Akikora ahabw'embabazi Ze ezirkwemariirira n'okutoorana Kwe. N'ahabw'ekyo, kwonka iwe ikiriza. Tikwo? [Ogwo mukazi yaagarukamu ati, "Amiina" -Omur.]

Ni bangahi omu bateeraine abaraakiirize? Twembi twemereire hanu omu maisho g'ekyo Kyererezi, titukabuganaga omu magara aga, tindikumanya ogwo mukazi buzima, eki ari, ahu arikuruga, eki arikwenda. Tinkamureebaga omu magara gangye, nk'oku ntakareebaga oriya mukazi eifo okwo omu magara gangye. Kwonka, nimureeba, eki nikyo ndikugyezaho kubooreka kukora: munagye hare okwo kutaikirizana hati, reero mwikirize Ekigambo Ekigambo ku kiraabe omuntu hanu hanu omuriitwe. Ekigambo nikihinduka ekihuriire omu mibiri yaitu, ekyo nikyoreka Okubaho kwa Ruhanga.

60 Hati ninshaba ngu Akimuhe. Naayenda ekintu ekishemereire. Taine mwana, naayenda omwana. Aine nk'emyaka makumi ana. Ekyo tihariho kubanganisa nikibaasika.

Bashutami aho aho honyini hati, abakazi abaabaire bari engumba amagara gaabo goona, kwonka bakaija aha kituuti bat, kandi Mukama yaabaha oruzaaro. Bamwe omuriimwe mwimutsye emikono yaanyu aho abarikumanya. Waareeba? Waareeba? Nkaimutsya omwishiki muto murungi ekiro kiri, Sande, ku naaherize kuruga hanu, Sande omu ihangwe; ou nyina yaabaire ari engumba, Mukama akagamba. Kandi omwishiki muto ogwo, murungi munonga, ari hanu? Ari nkahi? Yee. Ngugu hanu, hanu hanu, ashutami hanu hanu. Nyina ashutami hari. Ngugu hanu ogwo mwishiki muto, we wenka. Mwamureeba? N'Ekigambo ekyagambirwe okuruga ahari Ruhanga.

Hati, noikiriza n'omutima gwawe gwona? Noikiriza ngu ogwo mugisha ogu oine, ogu orikwehuriram u hati, ni Ruhanga arikugarukamu? Ruhanga ku yaakungambira eiziina ryawe, nikwo obaase kuha ogwo mwana eiziina, nooza kwikiriza? Kyaba kiri kityo, Muky. Thompson, noobaasa kutaaha otungye omwana waawe, ku oraakiikirize n'omutima gwawe gwona.

61 Noikiriza n'omutima gwawe gwona? Gira okwikiriza kwonka, orekye kubanganisa, ikiriza Ruhanga kwonka. Ruhanga ni Ruhanga.

Noogamba ki, sebo? Ningira ngu naiwe, titurikumanya. Obwire bwonka obu ndakureebire omu magara gangye, obu ndikumanya, n'obu waaba noi ja aho. Kandi nteekateekire ngu ori ishento w'Ow'eishe-emwe Shakarian, nari ondijo ou . . . Mashagian, Ow'eishe-emwe Mashagian, omweshongozi, ku oizire hanu. Reero naareeba waaza omu runyiriri rw'ab'okushabira. Hati, ahabw'okuba musya ahariiwe, kandi, nari ahariiwe, kandi naanye ndi musya, omu muringo gwona. Hati, Mukama Yesu ku arangambire ekintu eki o-eki ori, obundi eki orikwenda, ka tugambe tutyo; akakugambira, akangambira eki orikwenda. Hati, Yaaherize kukikuha. Ekintu kyonka n'okwikiriza kwonka okurikumara kuki kiriza.

Hati, ni bangahi abarikwetegyereza ekyo? Okwikiriza okurikumara kwonka kwikiriza ngu nootunga eki owaashaba! Mwareeba?

62 Hati, hati, ku oraabe ori hanu orikwenda ekintu, kandi Naabaasa kungambira ekyetengo kyaw e, obwo noomanya ngu tindikumanya ekyetengo kyaw e, kyaba kiri kityo nikiteekwa kuba Ekintu nanka hanu ekirikukikora. Hati, okurugiirira omu Kigambo, Akaraganisa kukora ekyo. Akamanya ebiteekateeko ebiri omu mitima yaabo. Tikwo kiri? Kare.

Oine ekyetengo ky'amaani ky'okutambirwa. Ekintu ky'okubanza, orwaire okwekanga, nooyekanga munonga. Ekyo n'amazima. Ekindi kintu, orwaire omugongo, kandi ogwo mugongo gumazire obwire guri kubi munonga, nangwa bakagushe mezaho. Ekyo ni OKU NIKWO MUKAMA ARIKUGIRA. Ago n'amazima. Mwareeba. Ekyo kihikire. Kandi nkiki hanu ekindi kintu, eki orikwetenga munonga, ni ngu, nooyetenga ngu oheebwe okubatizibwa kw'Omwoyo. Ekyo buzima n'amazima. Ija hanu.

Ruhanga Omukundwa, omu Iziina rya Yesu Kristo, ninshaba ngu omushaija ogu ajure Omwoyo Orikwera, atakarugire omu mwanya ogu, omu Iziina rya Yesu. Amiina.

Hati Mwakiire, ow'eishe-emwe mugyenzi wangye. Ogire okwikiriza kwonka, otabanganisa.

63 Noogamba ki? Nintekateeka, oku ndikumanya, ngu titurikumanya. Ekyo ku kiraabe kihikire, ahabw'enki, kugira ngu abantu bamanya, imutsya omukono gwawe kusha nikwo bamanya ku tutarikumanya. Tinkamureebaga omu magara gangye, kumumanya. Kandi nintekateeka ngu takandeebag, shana haaba hari okwo omu bahurikiize. Ahabw'okuba Tata ow'omu Iguru naamanya, kandi nkiki hanu Ekigambo Kye kitairwe hanu, ku ntakareebaga omukazi ogu, kumumanya, omu magara gangye. N'ahabw'ekyo, tinkaamanya ekikureetsire hanu, tindikumanya na kakye, eki, nari ekintu kyona ekikukwatsireho. Tinkaabaasa kukugambira ekintu na kimwe.

Ekintu kyonka, n'ekiconco kwonka. Kuri nimbaasa . . . Nk'oku mumpuriire ninshoboorora ekyo akaire akaahingura. N'okuza okwo ahaiguru kwonka, nkahurira ebi Arikugamba; eki ndikureeba, nimbaasa kukigamba. Eki Atagambire, tindikubaasa kukigamba. Nkaakigamba ahabwangye, kandi obundi kiba kigwire. Mwareeba? Obundi kikaaba kigwire. Kwonka ku Arikukigamba, nikiba kihikire buzima. Tikikaabaasa, tikikabahoga nshobe na kakye. Tikiriba nshobe na kakye obwire bwona yaaguma ari Ruhanga. Mwareeba? Mwareeba, ahabw'okuba Ruhanga takaashobya.

64 Kwonka Ruhanga ku yaakungambira eki orikwenda, ekyetengo kyaw e, nari-nari ekikureetsire hanu, ekintu eki waakozire, nari ekindi, ekintu nk'ekyo, nari eiziina ryaw e, ei orikuruga, nari ekintu kyona eki Arikwenda kungambira, okaikiriza? Yebare.

Ekintu kimwe, oine omurabanamu omu bigyere byaw e. Ebogyere byaw e nibikuteganisa. [Ogwo mukazi yaagira ati, "Eego" -Omur.] Ekyo kihikire. Imutsya . . . gwawe. Orwaire ekyejwiso, endwara y'abakazi. ["Eego."] Kandi oine ekyetengo ky'amaani omu mutima gwawe, ahabw'okuba nibwo oherize kuburwa omuntu nari ekindi kintu. N'omwojo, kandi omwojo waawe arugire omuka, yaatoroka, mbwenu nooyenda ngu nshabe nikwo agarukye. ["Eego."]

Ai Ruhanga omu Iguru, mugarurire omwana we. K'Omwoyo Orikwera azibire ogwo mutsigazi ori omu

ruguuto ekiro eki, amugarurire nyina. Omu Iziina rya Yesu. Amiina.

Ogwo Orikumanya naija kumukugarurira. Oteraarikirira. Ikiriza hati, otabanganisa. Gira okwikiriza kwonka, n'omutima gwawe gwona. Ikiriza, kandi Ruhanga naija kukuha n'ebyo ebindi.

65 Hati, okwo kumanya ebiri omu mitima kushatu nari kuna, eki kiri kyona, mwareeba, na-naagyenda okuhitsya obu kyatuma naaremwa kuhweza. Tindikubaasa kukishoboorora, tihariho omuringo gwona gw'okukishoboorora. Noogira oti, "Noomanyisa, ekyo kyatuma waaruha munonga okukira oku waabuuriraaho okumara edakiika makumi ana n'eitaano nari n'okukiraho, nooteekateeka?" Eego, sebo. Kuri zaaba eshaaha ishatu, tikikanduhize kityo.

Omukazi akakora aha kijwaro kya Mukama waitu Yesu. Kandi abantu abo tibarikunkwataho. Ahabw'enki, ogu mukazi hanu, reeba hanu, naabaasa . . . [Ow'eishe-emwe Branham yaagambira ogwo mukazi ati, "Ntaho engaro zaawe, mwareeba." -Omur.] Yankwataho hoonahoona, tikiine eki kyakora kyona, ndi omuntu. Kwonka naateekwa Kumukwataho. Kandi nyowe, ahabw'ekiconco, ni-ni . . . nikituma, weena nindugaho, reero ngamba eki ndikureeba kwonka. Mwareeba? Nikyo ekyo kyonka. Mwareeba, okunkwataho tikiine makuru, kureka naakwata Yesu okurabira omuriinye. Okwo nikwo ogwo mukazi yaakwatsire ahari Ruhanga okurabira omuri Yesu, obu Yesu yaabaire atarikumanya eki ogwo mukazi yaabaire arwaire. Akakora aha kijwaro Kye, yaagyenda yaashutama ahansi. Reero Yesu yaagamba-reero Yaagira ati, "Owankoraho n'oha?"

Reero entumwa zaagira ziti, "Ahabw'enki, buri muntu Naakukwataho. Ahabw'enki noogamba otyo?"

Yaagira ati, "Kwonka naahurira amaani Gandugamu.

Hati, nimumanya amaani eki garikumanyisa? Engoga. Akahwamu amaani ahabw'omukazi omwe Kumukoraho, kandi Ari Omwana wa Ruhanga. Kaashwa nyowe, omusiisi owaajunirwe embabazi Ze. Noomanya ahabw'enki nikikiraho? Ahabw'okuba Akagira ati, "Ebintu ebi ebi Nkora, naimwe muryabikora. Muryakora n'ebirikukiraho, ahakuba Nyowe ningyenda ahari Tata." "Ebirikukiraho obuhango," nikwo Kirikugira aho, kwonka enhoboorora ehikire y'Orugriika ni, "Muryakora ebirikukira ahari ebi obwingi."

66 Hati, ogu mukazi tindikumumanya. Tiinyine kyona eki ndikumumanyaho. Ni musya ahariinye buzima nk'oku abandi bariya baaba bari. Titurikumanyana. Kugira ngu abantu bakimanye, noobaasa kwimutsya omukono gwawe, ogire oti "titurikumanyana." Hati, Omwana wa Ruhanga, rimwe ku Araabe yaabugaine omukazi omu kaanya kakye akarikushushana n'aka, aha iziba, kandi Akagamba nawe akaanya kakye, Yaamanya omurabanamu gwe, reero Yaamugambira omurabanamu gwe. N'ahabw'ekyo ogwo mukazi akamanyira ahari ekyo, ku ogwo yaabaire ari Mesia. Hati ahakuba-ahakuba na . . . Wankwataho, naakukwataho, kandi tihaine ekyabaho. Kwonka okwikiriza kwangye (ahabw'ekiconco) n'okwikiriza kwawe (ahabw'okukiikirizamu) biraabaase Kumukwataho, kandi Akabaasa kugamba naarabira omuriitwe ku . . . akakugambira naarabira omuriinye, obwo noomanya ku Ari hanu nk'oku Yaabaire ari ahari-ahari eryo iziba rya Sukaara. Waareeba? Tahinduka, oku abaire ari nyomwabazyo n'eriizooba nikwo ari, kand nikwo ariguma ebiro byona. Ekyo nookiikiriza?

Oine emirabanamu mingi munonga, n'ebirikukubonabonesa bingi munonga, oburwaire bw'emiringo mingi! Kimwe aha bintu bikuru eki orikwenda ngu kishabirwe n'amahenengye. Ekyo kihikire. Tikwo? Nookookoota ahabw'amahenengye. Ku orikureeba noimutsya omukono gwawe . . .

67 Kandi waija noogyenda mpora, niinyjuka gye. Shana rindaho kakye, obundi ekindi kintu nikibaasa kugambwa ekirkubaasa ku . . . Nari, noomanya, nooyehuriram u ebintu; abantu, noomanya, nk'orwoya Orurikukihakanisa. Nibagira bat, "Ahabw'enki, ekyo yaakiteebereza," nari, noomanya, batyo.

Kwonka, nooreebeka nk'omuntu murungi, gamba naanye akaanya kakye konka. Ka twemerere hanu akaire kakye, ahabw'okuba nintekateeka ngu hariho ekindi kintu ekiri omu mutima gwawe eki orikwenda ahari Ruhanga. Hati, tinkaabaasa kugarukamu eshaara yaawe, kwonka Naabaasa kushu- . . . Ahabw'okuba, ku oraakiikirize, nikiba kyaheza kugarukwamu. Kwonka ku oraabe nooyenda kwikiriza kwonka; kutuma waikiriza. Hati, ka nkugambire, n'ekirkukwata aha mukundwa omwe otari hanu, kandi ogwo n'omurumuna, kandi ogwo murumuna nangwa tari n'omu ihanga eri. Ari omu ihanga eririkushusha nk'eririmu ebisharara, enyanja nytingi. Ningira ni nk'omuri Michigan nari nka . . . Yee, ni Michigan ei ari. Kandi arwaire oburwaire bubi munonga oburikwita, kandi obwo n'oburwaire bw'ensigo obutakaatambirwa nibwo burikumuteganisa. Ekyo kihikire, tikwo? Ekyo ni OKU NIKWO MUKAMA ARIKUGIRA. Hati, ako katambaara aku oine omu ngaro zaawe, aku waimutsya ahari Ruhanga, koohereze murumuna waawe kandi omugambre atabanganisa, kureka aikirize, kandi ekyo nikiza, naakira hati ku orakiikirize.

68 Noikiriza n'omutima gwawe gwona? Mwareeba, kyaba kiri kityo, ku oraabe noikiriza, hariho ekintu kimwe kyonka eky'okukora, ekyo ni, okukyakiira kyarimwe. Tikwo?

Hati nimugira muti, "Ekyo naakireeba, abantu abo. Ekyo nikyo arikukora, naabareeba." Ekyo nimukireeba emirundi mingi munonga!

Kwonka okugira ngu mutabaasa kumanya eki . . . Omukazi ogu hanu, ija orubaju oru, mukazi 'we, hanu, omurwaire, oku ori kwona. Tindikumureeba. Noikiriza ngu Ruhanga naabaasa Kunshuururira omurabanamu

gwawe? Imutsya emikono yaawe, ku oraabe noikiriza, ogu mukazi hanu, ogu mukazi hanu, omurwaire. Yee. Yee. Kare, mbwenu ekyo ku oraakiikirize n'omutima gwawe gwona, obwo burwaire bw'amahiima tiburigaruka kukuteganisa bundi. Kare, taaha omuka kandi okiikirize! . . . ? . . .

69 Tinaamureeba, tikwo? Mwareeba, Ya . . . Nooreeba orubaju oru, okworekwa kuri aho n'obu haakubaho ki. Amiina! Timurukukireeba? Kihikire buzima nk'oku Ruhanga arikubaasa kuba ohikire!

Noikiriza, naiwe? Amahima nigabaasa kukurugaho, naiwe, tikwo? Noikiriza ngu nigabaasa kukurugaho? Kare, gyenda ogambire Mukama Yesu ku O-Orikumwikiriza.

Ekiro kimwe noi ja kwetaagisibwa kukwata e-enkonin kyewaaba noogyenda ago mahenengye ku garaakuremahaze, kwonka tigarikuza kukuremahaza. Tori, torikwikiriza ngu nigaija kukuremahaza, tikwo? Noikiriza ngu nooza kuba gye? Yegyendere, ahabw'okuba Yesu Kristo yaakukiza.

Oburwaire bw'omutima bwita abantu, kwonka tibushemereire kukwita. Noikiriza ngu Ruhanga naaza kubukutambira, kandi akukize? Gyenda orikukiikiriza n'omutima gwawe gwona, noogira oti, "Buzimazima ninkiikiriza."

70 Noogamba Orungyereza? Nooyetegyereza Orungyereza? [Ow'eishe-emwe Branham yaagira ati, "Hagire omuntu owaija." Omuvunuuzi yaija -Omur.] Yee, ni kirungi. Noija kumugambira ebi ndaamugambre? Mugambirengu ku araikirize, oburwaire bw'omunda nibumurugaho. Na-naakiikiriza? Oburwaire bw'omugongo gwawe nibukurugaho, nabwo, n'ahabw'ekyo hati noobaasa kugyenda kandi okire.

Ori ota? Noikiriza? [Omukazi yaagira ati, "Eego, sebo." -Omur.]

Ogwo mushaija oshutami aho aine oburwaire bw'omugongo, yampanga amaisho ku naagamba ekyo. Naabaasa kutambirwa, nawe, ku oraakiikirize, sebo. Kare, sebo.

Ogwo mukazi oshutami aha musikye gwawe aho aho, orwaire ebitsya, tikwo, mukazi 'we? Noikiriza ngu Ruhanga naakutambira? Nooyenda kuta engaro aha mwojo muto ogwo ahabw'amaju ge, kandi nawe, naakira. Nookiikiriza? Obaire orwaire ekyejwiso, endwara y'abakazi, hati togiline. Okwikiriza kwawe kwakutambira kandi kwakukiriza kimwe.

71 Nimwikiriza Yesu Kristo, Otahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona? Kyaba kiri kityo reka tute emikono yaitu omwe aha ndijo reero tushabe eshaara egi y'okwikiriza, buri omwe omuriitwe, tushabe eshaara y'okwikiriza.

Ruhanga omukundwa, obu tushwekyeirwe kimwe omu Kubaho Kwawe kw'Obwaruhanga, Okukureeba noogyendagyenda omu bahurikiize, nootambira abarwaire hoonahoona. Niiwe Ruhanga. Ninshaba ngu otambire abahurikiize aba boona. Ikeriza Omwoya gwa Ruhanga gushuume busya omu mitima yaabo, kandi obamanyise ku obwire buriyo nibuhwayo. Tutsigaize obwire bukye bw'okumara hanu, bwanyima nituza kuba Nawe Ogwo ou turikukunda. Ninshaba hati ngu Okubaho Kwe kureete okutamba ahari buri omwe.

Nitukabukira Sitaane, nitukyeena ebikworwa bye byona. Omu Iziina rya Yesu Kristo, Sitaane, ruga omu bantu.

Boona Abaraamwikirize hati, kandi mukaakiira okukira kwanyu, mwemerere aha bigyere byanyu, mugire muti, "Nyowe hati niinyemerera kwakiira okukira kwangye. Ninkiikiriza." N'obu embeera yaawe yaakuba eri eta, ku oraabe nookiikiriza buzima, yemerera aha bigyere byawo. Hati imutsya emikono yaawe, ogire oti, "Yebare, Mukama Yesu, okuntambira." Ruhanga agume naimwe.



www.messagehub.info

Obutumwa obu bukabuuirirwa
William Marrion Branham
"... omu biro by'eiraka ..." Kush 10:7